

## *ASO LULU, 29 IUNI 2022*

*Na nofoia e le Fofoga Fetalai le Nofoa i le itula e 9:30 i le taeao*

Tatalo.

**FOFOGA FETALAI:** Ou te faasilasila atu ua amatalia nei Tualumaga a le Fono Aoao Faitulafono.

Ia, e i ai le manatu o le Nofoa o le aso lenei o le toe aso foi lenei o le tatou galuega mo le lauliliuina o le Tala Faatatau Faaopoopo o le Tupe (Nu.2) 2021/2022 e faapea foi le Tala Faatatau Autu o le Tupe 2022/2023.

Ia, avea lenei taimi e faatalofa atu ai i tulaga aloaia i le paia o le tatou Maota i le afio o lau Afioga i le Sui Palemia, afifio foi a outou Afioga i Minisita o le Kapeneta, afifio foi Minisita Lagolago. E faapea foi lea Itu o le Maota i le afio o le Afioga i le Sui Taitai ma le Itu Agai aemaise o sui usufono mamalu uma o le Palemene. E faatalofa atu i lenei taeao fou i le alofa ma le agalelei o le Atua.

I le tapuaiga a Ofisa Sili o Pulega o Matagaluega ma Faalapotopotoga Tumaoti a le tatou Malo, ia malo le soifua manuia.

Le faafofoga tapuai mai a le atunuu i ona tulaga faalupelupeina i lenei taeao, matou te faatalofa atu, tapuai maia ma le manuia.

Le alofaiva o le tatou Maota i lenei aso, ia manuia tele le usugafono.

### **TULAFONO TAU FAAOFI O LE FAATATAUINA O TUPE FAAOPOOPO (NU.2) 2021/2022 & TULAFONO TAU FAAOFI O LE FAATATAUINA O TUPE 2022/2023 – felafolafoaiga faaaauau i luga o le faitauga faalua – Aso Fono Iona 7**

**FOFOGA FETALAI:** E tolopo Galuega le Fono Aoao Faitulafono i le po anapo, o lo o saunoa talifuaitau le Afioga i le Miisita o Pisinisi, Alamanuia ma Leipa i mataupu sa laga i saunoaga faalauaitele a sui usufono o le Palemene.

O le mea lea ou te tapa ma le agaga faaaloalo lau Afioga i le Minisita o Pisinisi, Alamanuia ma Leipa e te tulai mai e faaaauau lau saunoaga.

**Tofa Hon LEATINUU WAYNE SOOIALO (Minisita o Leipa ma Fefaatauaiga):** Ia, faafetai lava i lau Afioga i le Fofoga Fetalai i lenei taeao

fou ma lenei taeao totoa ma le manuia. Lau Afioga i le Fofoga Fetalai, ou te pipii atu i le tatou taulaga siitia i lenei taeao ua molia ai e lau Afioga le faafetai ma le agaga i lo tatou Matai Sili o i le lagi ona ua mafai ona tatou toe aulia mai lenei taeao fou, lenei taeao manuia.

Ou te muai faatulou atu i le alofa o le Atua ua mafau ai ona tatou maua lenei taeao lau Afioga, ua maua ai se isi aso fou e mafai ona faaopoopo i aso o le tatou soifuaga aemaise foi o le taumafaiga o le tatou fonotaga.

Lau Afioga i le Fofoga Fetalai, ia ua taunuu tonu mai lava le faigamalaga a le Afioga i le Tamaitai Palemia, a o lo o taumafai atu se lauga mai lenei vaega foi o le tatou Malo. E talitonu le agaga o le lauga loa foi lenei a Faleata lau Afioga, e le mafai ona matou laaloe ae le i afio mai le Tamaitai Palemia. Ia o teine a nei o le itumalo lenei ua toe taofiofia foi i le tatou fonotaga anapo seia oo mai i lenei taeao. Ae faafetai i le alofa o le Atua o lenei ua taunuu ma le manuia le faigamalaga a le Tamaitai Palemia, o lea ua tatou feiloai ai i lenei taeao.

Ou te faatulou atu i le paia maualuga o le Maota nei, o le paia lava lea o Samoa mai le taisamasama o le Tuimanoa seia paia Fili ma Puletuu na tauilo ai Malo.

Lau Afioga i le Fofoga Fetalai, e motusia le tatou faasalalauga anapo ua oo se faamatalaga foi a lenei Sector i le tulaga o le tau o le soifuaga iinei i le tatou atunuu. O le a le toe faasilia foi se faamatalaga ae o le a faaauau loa ona e manumanu i le tatou taimi lau Afioga. E motusia le faasalalauga anapo lau Afioga o lo o i ai se faamatalaga i le tulaga o le siitiaga po o le fesuisuiaiga o le tau o le soifuaga iinei i le tatou atunuu. E pei ona ou taua le tulaga i containers e omai e aumai ai a tatou oloa i Samoa, e fai lava si tele o tulaga nei e fai mai ai tatou uta iinei i Samoa, ae o se faataitaiga pe tasi le malaga a le vaa pe 80 i le 100 containers e mafai ona aumai ai. Ae a oo ina toe foi containers nei, e leai ma ni oloa e avea ai, a tele pe na o se 10 pe 20 e toe foi ai. O lona uiga, o le matau a au nei ma le Matagaluega, ua faaogaina e i latou e ona kamupani nei kamupani vaa, le tau e aumai ai le oloa i Samoa ma le tau e toe faafoi atu ai container i atunuu i fafo ona o le leai o ni oloa e avea ai. O le mea la lea lea ua ou matauina, ua pei ua taugata ai, e ese mai ai ma le va o isi atunuu, Asia ma Niu Sila, Asia ma Ausetalia, e tumu atu le vaa lau Afioga toe tumu mai foi. O lona uiga, o lo o totogi uma lava e itu e lua le alu o container nei. Ae se paga iinei i Samoa, ua tele i empty containers o lo o tumu ai luga o le uafu, ona e leai ni tatou oloa e ave i fafo. E tasi lea tulaga ou te iloa ua fai ai si taugata o le tau o le tatou freight lea e aumai iinei i Samoa.

Ae le gata i lea lau Afioga, e matauina foi e le Matagaluega ma au nei, le tele o vaa e sopolia le tatou ogasami, e omai mai Amerika e o i Niu Sila, omai mai Niu Sila e o i Amerika faapea foi ma Ausetalia, ae le afea Samoa ona e i ai le mafuaaga. O vaa nei e omai iinei i Samoa lau Afioga, o lo o omai lava latou ma i ai latou siligi e mafai ai ona ave i luga le container ma

ave i lalo, ave i lalo ma ave i luga. O vaa la ia e kolosi tatou ogasami, o vaa ia e feoi e leai ni latou siligi pe leai ni latou cranes se i tulou le mamalu o le tatou usugafono. E le mafai ai la ona aumai ni tatou oloa ona e leai se cranes i luga o le tatou uafu iinei i Samoa.

O lea foi la e tatalo atu i le Afioga i le Minisita o le Uafu, pe le tagai i le tulaga lea ina ia fai se tatou siligi i luga o le tatou uafu, ina ia mafai ona afea ai e vaa nei o lo o feoi mai i tatou ogasami ona aumai ai foi ni tatou uta iinei i Samoa ia ma faaauau atu ai mo Amerika pe faaauau atu ai mo Ausetalia ma Niu Sila, atonu e i ai se fesoasoani i ina lau Afioga ina ia mafai ai ona faataugofie le tatou oloa o lo o feaveai mai. Ae faigata, ia e tasi lava pe lua nai vaa ia e oo mai iinei i Samoa, ia ma Ausetalia, e le o toe oo mai se tatou vaa i Ausetalia i Samoa nei, ua atili ai ona taugata lau Afioga.

Ia o lea foi la e tatalo atu ai i le Afioga i le Minisita o Galuega, pe le tatau ona tilotilo i se vaa lava ia mo Samoa ina ia mafai ona faataugofie ai le tulaga lea e feaveai ai a tatou oloa. E i ai nisi tamalii sa taumafai i le tulaga lea o vaa, peitai, pei e le feauauai ona o le tele o nisi kamupani, e control mai lava e suppliers mai fafo le mea e ave i ai lau uta. Ana faapea e ave uma i se vaa se tasi ona aumai ai lea, atonu e taugofie ai lau Afioga.

O le tulaga i le fesiligia foi o tulaga i le tau o oloa, o tiute o Matagaluega ma Komisi o Faiga Faatauvaga lea ua i ai nei, lea la ua sui ai nei le tatou Price Control Board. O i latou la ia, o lea ua i ai lava le tatou Komiti e iloiloa tatou oloa iinei i Samoa. O i ina foi, e ave i ai complain a i latou o lo o i ai le masalomiaga ua sii i luga le tau o oloa e aunoa ma se tau faatatau ua ma ona avatu. O le tulaga la lea, e tatau ona toe tilotilo lelei i ai le Matagaluega. O lo o fai foi a latou asiasiga. O lo o fai le Price Control pe a uma lea masina ma lea masina ina ia mafai ai ona tumau pea le tau o oloa, ae peitai, e pei ona tatou tilotilo foi i le tau o oloa e aumai le vaalele, o lo o tumau lava le tariff po o le tau lea e aumai ai, ae pau le eseesega lea ua i ai, ua fesiisitai le tau o le penisini po o le fuel surcharge o lo o i ai i luga o mea nei, a o lo o tumau lava le tau. O lona uiga, e iloa mai ai i i, o le suauu le mafuaaga o le siitia o tau o oloa o lo o auina mai luga o le vaalele. Lau Afioga, pau lea o mataupu sa talanoa mai ai nisi o tulaga i le tau o tatou oloa.

Ona oo mai ai lea i galuega faavaitaimi lau Afioga po o seasonal workers.

**Afioga Sulamanaia Fetaiai Tauiliili Tuivasa (Vaimauga 1):** Lau Afioga i le Fofoga Fetalai...

**FOFOGA FETALAI:** Ia, malie lau Afioga i le Minisita se i tuu atu le avanoa i le sui usufono mo Vaimauga 1.

**Afioga Sulamanaia Fetaiai Tauiliili Tuivasa:** Ia, e faatalofa atu foi lenei usugafono i le Afioga i le Fofoga Fetalai aemaise foi o le paia o lena Itu i le

afio o lau Afioga i le Sui Palemia aemaise o Minisita ma le paia o lenei Maota. Sa lauga ai le sui usufono lenei i le Price Control.

A o le i oo la i le tulaga lea e momoli le agaga faafetai i lau Afioga i le Minisita i le saunoaga matagofie anapo sa afea ai lenei itumalo i tatou fanau. Ia viia le Atua ua tali faaaliali lau Afioga i le Minisita. Ia o ituaiga Minisita na o lea e manao ai le atunuu ia faatino manaoga o itumalo, e le gata o le Vaimauga, o lea ua... E oo mai i le taeao lenei lau Afioga i le Fofoga Fetalai o lo o vilivili atu pea ma faafetai atu le itumalo lenei o Vaimauga i le matagofie o le saunoaga a le Minisita anapo i ou eleele. E pei la o le mea lenei o lea e faaleo ai le agaga faafetai i lau Afioga i le Minisita, o lea ua tali mai i manaoga sa i ai i le Paeaiga ua tuanai.

A o le Price Control lea sa taua e lou sui usufono, e le tau selu atu foi i lau Afioga ua leva ona e galue i le Private Sector e malamalama uma i tulaga ia i freights. O lea e i ai le tatou Tulafono foi lea o le Consumer Projection po o le competition lea sa fai e faatauvaga le o i lalo. A o le popolega o le sui usufono o le Vaimauga, ona o le taimi lenei ua leai, pei ona e saunoa ua leai ni vaa e aumai ai oloa. O le popolega lea e i ai e oo loa i le taimi foi lea ua sioki oloa ia ona tafili saunoa loa lea o le aufaipisinisi lea e faatinoa oloa nei. Pei e taumafai lava e faatau uma atu lava ia latou pei e taofi ae faatalitali lava i le taimi mulimuli lea. E pei la o le tatalo a lenei itumalo sa tuuina atu i lau Afioga i le Minisita se i toe silasila lava lau Matagaluega ina ia faamallosia o tatou tulaga foi lea i le faapipii o le tau o le pusamoa i faleoloa uma lava, ina ia mafai ona sulufai atu e le i oo i le taimi lenei po o le \$79 pe fia la e i ai. Ae masalo e oo loa i le taimi mulimuli foi ua le oo mai le pusamoa, e te i lava ua tatou o atu ua \$90, e faapena. Ae manaia lava le faamallosia e lau Matagaluega, fai asiasiga ma asia pisinisi, e le faapea a sioki le oloa ona toe oo ai lea i luga i le tulaga lenei.

E pei o le agaga lenei sa toe tuuina atu ai le tuulalo, e pei sa tatou le, se i tulou, i le tulaga lea i le Price Control, ona sa tatou vaai foi i le tulaga foi lea faatauva i le pule o le pisinisi i le maualalo e alu i ai. A o le taimi la lenei ua taugata le soifuaga ma o lea ua e saunoa manino i le utiuti o vaa e omai ma aumai oloa, ia se i silasila ane lau Afioga. E pei o le agaga lenei e momoli atu ai le agaga faafetai, o le agaga lenei lea sa avatu ai le tuualalo, toe silasila le Matagaluega e fai asiasiga ia faapipii lava tulaga na i luga ia ona fai lava lea lipoti mai ma vaai e le faapea a sioki le oloa ia ona tuu ai lea i luga le tau o le pusamoa ma tau o oloa i le taimi mulimuli.

Ia lau Afioga i le Fofoga Fetalai o le agaga lenei o le faafetai o lenei itumalo i lau Afioga i le Minisita, ae faasao atu, o le Maota lenei, o lea e tu i eleele o le Vaimauga e le o Faleata. Sina mea faasao foi lea leaga o lea alu i faamaumauga a le tatou atunuu, o le eleele lava o le Vaimauga e pule lava ilamutu ma mea faapena o le Vaimauga. Ia manuia lau Afioga Fofoga Fetalai.

**FOFOGA FETALAI:** Malo faafetai. Mo le faasaoina o le taimi o lau Afioga i le Minisita, se i tulai mai lau Afioga i le sui usufono mo Aleipata Itupa i Luga.

**Afioga Fuaava Suluimalo Amataga (Aleipata Itupa i Luga):** Faafetai. Mo le faasaoina o le taimi o le Afioga i le Minisita, ia ona o lea ua maea ona saunoa i le tulaga lea sa aafia foi i le lauga a lenei itumalo i le tulaga lava lea o le tau o le soifuuga. Faafetai o lea ua e saunoa manino e faamalamalama tulaga o lala uma ia e mafua ai ona siitia le tau o oloa, aemaise o tulaga i vaa, o le freight, ia o lea ua e taua foi le uafu. Ia, na ona toe faamaite atu e lenei itumalo aemaise o lau Afioga le tulaga foi lele i le uafu lea sa tapena i ai fuafuaga a le tatou faigamalo talu ai i le 2015, le master plan o tatou harbor ma ports ia na tapena ai, atonu o se ata na faataatia o gatai tonu lava o Vaitele, e le aafia le tatou togatogo i Vailoa ma Vaiusu ma tulaga uma faapea. O lea ua e saunoa i cranes ia e sao lelei. Ou te iloa o la e silafia foi e le Minisita o Galuega, ou te iloa le uafu lea a tatou i Matautu e le gafatia le ituaiga lea, aua o lona uiga e toe re-design atoa le load o le uafu, aua o cranes foi ia e le o ni mea mama. O lona uiga e toe gaepu uma ma toe fau se uafu fou, aua o le tele foi o cranes ia i luga o uafu tetele nei, e mobile, e feoai i le mea e tutu ai... ae pei e na o se tulaga e faamaite atu pea, o le tatou uafu lea na fuafua o se uafu tele, e design na ua i ai uma specifications, e i ai cranes tetele ia, pe a faapea ua agai le tatou faigamalo e tuutuu i lalo tulaga o tau o freights ma tulaga uma faapena. Ma le agaga faaaloalo.

**Tofa Hon LEATINUU WAYNE SOOIALO:** Lau Afioga i le Fofoga Fetalai, e le o i ai le suafa o le sui usufono i fesili ia. A o lea o le a ou tali atu i si ou uso mai Vaimauga, ae taatia le mafaufauga o le Afioga i le sui usufono, o lea foi sa ou fai atu, leai, ou te au i le faiga o le uafu, ae le faia i Faleata, ave e fai i tua pe a faapea o le finagalo lena o lau Afioga, i tua i le tou itumalo.

Lau Afioga i le sui usufono mo Vaimauga 1, faafetai. Ou te iloa o le tulaga foi lena na aumai ai au i i ae e nofo i ina, e tatau lava ona i ai se isi e fai a le mea o lo o e finagalo i ai. Ia o lea o le a taumafai atu ai. Faafetai i lau fautuaga foi mo le siitia o le tau o oloa, o lea e faalogologo atu le Matagaluega o i latou e faatinoina mea ia. Ua uma ona faatino, ua uma ona i ai le au asiiasi, ae le mafai ona tatou control ina atu le tau o le oloa iinei pe a faapea e sau mai fafo, vagana ni oloa o fai iinei i Samoa ona mafai ai lea ona tatou faia.

Lau Afioga i le Fofoga Fetalai, ia ona ou oo atu lea i le tulaga lea o le galuega faavaitaimi...

**Afioga Hon Lautafi Fio Selafi Purcell (Satupaitea):** Lau Afioga i le Fofoga Fetalai, pe maua se avanoa...

**FOFOGA FETALAI:** Malie lau Afioga i le Minisita se i tuu atu le avanoa i le sui usufono mo Satupaitea.

**Afioga Hon Lautafi Fio Selafi Purcell:** Ou te manatu o lea ua tau see ese le Afioga i le Minisita mai mea ia sa saunoa i ai i mea lava ia o le maua o ni tatou maketi ma ni tatou partners foi ia tatou te feaatauai. Ou te manatu lau Afioga ou te fia faafesili atu po ua i ai se atinae, se development o le tatou Feagaiga tau feaatauaiga foi lea le Region PACER Plus o lea ua faatu le ofisa i inei, aua tasi lena taumafaiga sa taumafai i ai le Malo ua tulai atu, ina ia mafai ona tatou feaatauai lava ma totonu o le tatou region, lea e faapea e o fua tatou containers e leai ni mea e avea, atonu a maua le tatou maketi foi ia i nuu lava o le Pasefika, atonu e le oo i le tulaga lea. Ia na ona fesili atu i lau Afioga pe ua i ai se alualu i luma po o alu agai tua. Faafetai.

**FOFOGA FETALAI:** Ia se i tulai mai lau Afioga i le Minisita.

**Tofa Hon LEATINUU WAYNE SOOIALO:** Faafetai lava mo le faafesili. O le tulaga i le PACER Plus, o lea ua i ai Samoa i totonu o le aiaiga o le PACER Plus. Ae peitai, o lo o i ai le atunuu o le Pasefika e pito sili ona taua i le PACER Plus o lo o taumafai e aumai i totonu o aiaiga nei, o Fiti. O lo o faatuiese pea Fiti i le PACER Plus, ina ia taumafai e puipui foi le latou tamaoiga ma puipui latou products mo le aumai i totonu o Samoa aemaise foi isi atunuu. A faapea loa la e auai mai Fiti i totonu o aiaiga nei, ou te talitonu o le a amata ona atoa mai le tino o le PACER Plus i le taimi lenei. O lea ua i inei le latou ofisa, o lea foi ua galulue, o lea foi ua i ai le manaoga ma maliega o Samoa e auai atu i tulaga ua uma ona faatulaga o le PACER Plus, ae peitai lau Afioga, o le faiga lava lea o tulaga faapenei.

O lea faatoa ou foi mai le Fono a le Ministerial Conference – WTO, lea sa i ai aiaiga sa fai, e tasi lava le atunuu e le malilie i se aiaiga, aemaise lava o le aiaiga lea o le fisheries subsidies lea o lo o tetee i ai Initia. Lau Afioga, ua ova ma le 20 tausaga o taumafai e fai negotiations o mea nei, e le au lava Initia ona o le tulaga e i ai, e toatele ana tagata faifaiva ae a avatu subsidies o mea nei, a tufa i Initia, na o le tai \$18 a le faifaiva e tasi. E ese mai la i faifaiva a le Pasefika, a aumai se fesoasoani e maua le tai \$30,000. A o lea lava e faatali le tatou tupe maua lea. Pei o le agaga lea, a le malie i ai le atunuu e tasi, e faigata lava ona atoa se aiaiga ina ia mafaia. Ia o lea la ua malie Initia i aiaiga ia o faigafaiva, lea la e ui lava ina umi le fonu, a o lea ua malilie uma atunuu o le laloagi sa i ai, ina ia mafai loa ona aumai le subsidies lea o faigafaiva aemaise foi faatoaga.

Ua ou avatua le mataupu lea lau Afioga ona o lea ua aumai le pacer plus, e faapea foi la le tulaga ia Fiti, e taua tele i le Pasefika le auai mai o Fiti i tulaga ia.

Lau Afioga i le Fofoga Fetalai, e le umi foi se manatu i le tulaga o galuega faavaitaimi, ona o lea ua amata ona galulue le Komiti lea e toe aiaia aiaiga ma tuutuuga aemaise foi le tulaga o le pikiina o tagata i galuega faavaitaimi. E pei ona ou taua i se taimi ua tuanai, o i latou e tataua ona faamuamua i galuega nei, o i latou e leai ni galuega, o unemployed. Ae foliga mai, o le process lea o lo o faatino e le Matagaluega i le taimi lenei, o lo o alu lava latou i le tagata e sau e fai mai e leai sana galuega o i ai. A faapea lava la e sau le tausimai po o le leoleo po o le faiaoga ae faapea mai i le Matagaluega o au e leai sa u galuega, e leai se mea a le tatou Matagaluega e mafai ona fai i ai ona o la e sau i luga o le tulaga e le o faigaluega. O lea la ua i ai le aiaiga i le taimi lenei, o lea ua i ai le Komiti. O le Komiti lenei o lo o i ai, o le Samoa Hotel Association, o i latou ia e pito i sili ona aafia, ona ua ave uma o latou tagata i le taimi lea sa lockdown ai le atunuu, o le Chamber of Commerce, sui o le International Labour Organisation po o le ILO, Samoa National Council of Churches, aafia ai ma aulotu ona ua leai ni aufaipese, Samoa Association of Manufactures and Exporters, ua aafia ai ma i latou ona ua leai ni tagata. Ia o lo o i ai i totonu ma Poutasi Development Trust, o i latou nei ua leva ona latou faatinoina lenei galuega, lea la e aumai ai le latou expertise po o le latou fesoasoani i le tulaga lea. Samoa workers congress. Matagaluega o Tina ma Tamaitai, Atinae o Nuu ma Agafesootai.

O le agaga o le Minisita ma le agaga o au nei aumai i tua le recruitment i itumalo taitasi, lea ua i ai Ofisa o Itumalo. E pei ona ou fai atu i le taimi muamua, a faapea e aumai ni requests e employers mai fafo e 8,000 tagata e manaomia, vaevae i itumalo e 51, tai 160 a le itumalo, recruit mai i ina. A aumai loa la i totonu i ina, aumai faaalu agai le Matagaluega lea o Pisinisi ma Alamanuia, aemaise o la e silafia e itumalo latou tagata ia e aumai ma latou fanau ia e aumai. A oo la ina faaletonu mai o, a o la e mafai ona alu atu le Matagaluega i le itumalo, ia o tou fanau ia na aumai e ave i o ua faaletonu. A faapea lava e laugatasia uma itumalo e 51, 160 recruit, e tutusa uma. E tutusa lava aua leaga e i ai isi itumalo e laiti. Ia pau lava ua laki latou ona o le tulaga ua i ai le iloiloga a itumalo. O lo o i ai foi ma le Matagaluega a le Palemia ma le Kapeneta, Matagaluega o le Va i Fafu ma Fefaatauaiga, Matagaluega o Pisinisi, Alamanuia ma Leipa. E toa-11 i latou, faaopoopo mai ai ma sui o le Ofisa o le Niu Sila ma le Ofisa o Ausetalia, lea la e toe iloilo ina le tulaga i galuega faavaitaimi. Ua tele le faafitauli lea e i ai, tele le faafitauli. Ou te le toe fia talanoa foi i faafitauli i social issues i le tulaga lea ua i ai. Ou te alu ese mai nei ma Ausetalia ua oo ifo le isi lipoti i le isi tatou tama fanau na o le 22 tausaga lau Afioga i le Fofoga Fetalai. Tolu faamalosi, e oo i tina matutua ua tai 80 tausaga ua oo i ai le tulaga lea. E oo i tamaiti laiti tai 15 tausaga, ae toatasi e alu atu iinei i Samoa.

O le agaga la lea e mananao i ai le Matagaluega, e tataua ona aveese, tataua ona weed ese ona e a? Ona e faigata. A o le tulaga lea e i ai, ona sa piki mai so o se isi e oo mai e faatumu le form. E le mafai ona matou o i itumalo

matou faapea atu, o lau tama fanau lea, fai i ai se fuafuaga ma toe faafoi mai. O le tulaga la lea lau Afioga, a uma le iloiloga o le tulaga lea ua i ai galuega faavaitaimi, ona tatou maua ai lea o se tulaga filemu. O lo o tauva foi isi atunuu o le Pasefika e i ai.

O lea foi ua tulai mai le Malo fou o Ausetalia lea ua i ai i le taimi lenei, e ogaoga foi o latou manaoga fou ia ua i ai. E i ai le manaoga lea e i ai faapea a malaga atu le tama faigaluega po o le tina faigaluega iinei, e avatu ai ma lona aiga. Se i tatou faatalitali po o fea e oo i ai le tulaga lea, malaga ia e faapea e tai 3 tausaga. Ae faigata o lo o faamautu pea le faigamalo i iuga a le faigamalo o lo o i ai i le taimi lenei, ia ona maua ai lea o se tulaga faapena.

Ona ou oo mai lea i le Ofisa Sooupu Faaopoopo po o le Liaison Officers. E 4,000+ o tatou tagata galulue i Ausetalia, ae tasi le tagata o lo o faia le galuega lea o le Sooupu po o le Liaison Officer. O Ausetalia o le mea tele, o le konetineta, e sau lava mai Brisbane e tau i luga i Sini, ia ma tulaga faapena. A faapea la e i ai se mataupu e manaomia ai le Sooupu i Brisbane, ia, ona sau lea, e faigata tele. O lea la ua i ai le aiaiga, o lea o lo o tausaili avanoa ia ma tausaili foi po o ai e fesoasoani mai e sponsor ina ia avanoa ona e pei ona silafia, o galuega uma ia o lo o faatino e Alamanuia ma Pisinisi, e leai se tupe a le Matagaluega e maua ai, e tele le process, ae leai se tupe, ona o nei galuega, e fai i luga o le auaunaga a le tatou faigamalo ma le tatou Malo o lo o i ai i le taimi lenei.

Lau Afioga i le Fofoga Fetalai, ona ou oo mai lea i le tulaga lea o tupe teufaafaigaluega mai fafo. Ou te iloa o le mataupu lea na manao i ai le fesili, o le lisi lea o le mea lea o le foreign investment po o le citizenship investment i le tulaga lea o lo o i ai. O le faamoemoe o lenei Tulafono, o lo o faamalosia e le Mataglauega ina ia faatosinaina mai kamupani tetele mai fafo e faafaigaluega a latou tupe i Samoa nei ma maua ai avanoa faigaluega mo tagata Samoa ma fesoasoani i le atiaeina o le tamaoiga.

Lau Afioga i le Fofoga Fetalai ma le mamalu o le Maota, e talu ona faamalosia lenei Tulafono mai ia Ianuari 2017, e le i i ai lava se kamupani mai fafo ua faamatuuina atu i ai se sitiseni. O aiaiga, ia teu le vaegatupe maualalo e \$4 miliona ma faagaioi ai le pisinisi. E \$2.5 miliona tulaga gafatia po o le net worth o le pisinisi. Filifilia o se pisinisi agavaa mai atinae e 8 o lo o i ai le qualifying investment areas ia e i ai lau Afioga. Lisiina ma atinae o fanua o le malo lisi, ia ma isi aiaiga ia e i i, ae o le faalavelave e le i i ai lava se kamupani mai fafo, ua mafai ona latou tilotilo i le tulaga lea. O lona uiga ua tatau foi ona toe iloilo lea Tulafono lau Afioga pe aoga mo tatou pe le aoga mo tatou, mo le taimi lenei.

Ona ou oo mai lea i le tulaga lea mo le fesoasoani a le Sport Development Fund, lea sa fesiligia foi e nisi o afioga i sui usufono. I le tulaga o tupe e avatu e fesoasoani mo taaloga. Ia o lea ua uma ona faamalamalama e le Afioga i le Minisita o Aoga le tulaga lea. O le a le toe oo tele i ai se faamatalaga. E na o le pau lava le mea e fia faailo atu, o le lakapi lava ia, ua



uma ona fai le latou aiaiga ma le Gambling Control Authority i le 2018, e ave i ai le \$500,000 mai totonu o le Matagaluega lea e fesoasoani ai i le lakapi. E le mafai la e le tatou Gambling Control ona ave uma se \$500,000 i le taimi e tasi, ae o lo o faasoasoa atu pea i le taimi lenei. O lea la ua uma ona ave le \$150,000, ae toe \$350,000. O lea ua lelei mai le lakapi, ua vave foi ona avatu i ai se fesoasoani, pe a oo foi i le tulaga e amata ai ona faatino tulaga ia lau Afioga. O lona uiga o lo o fai lava le galuega, a lo tatou Malo aemaise lava Matagaluega foi ua i ai a latou aiaiga, ae o le a ou le oo i isi Matagaluega o lo o faia foi lena fesoasoani e pei o le SIFA ua leva ona ave le latou fesoasoani. O lona uiga, o tatou tagata taaalo o lo o tausii lelei pea.

Ona ou oo mai lea i le SSFA ma le galuega a le SSFA o lo o ave i sports nei. O lo o talosaga mai i ni fanua e fai ai a latou taaloga. O lo o talosaga mai i ni fale e fai ai a latou taaloga. A maua la le fale pe maua le fanua ae toe aumai ai ma le talosaga e pau i lalo le rate pe pau i lalo le tupe totogi. E faapefea la ona ola le tatou SSFA pe a faapea o le tulaga lea o lo o i ai. A o le taimi foi lenei, o lo o i ai foi se feteenaiga i le va o le SLC ma le SSFA, ona o fanua nei ua uma ona ave e le Malo i le SSFA, o lea ua toe faafoi i le SLC. Ona i ai lea o se tulaga e tataua ona faasao. A faapea o fanua nei ma fale nei ua uma ona ave i le SSFA, e tataua ona fai ni aiaiga ma fai se lisi o le fanua ina ia mafai ona aumai ai e le SSFA, le lisi o fanua nei ma lisi o fale nei, ina ia mafai ona faatinoina. O lea sa tatou molimauina, o le afa o le tatou Apia Park, ave sao lava i le soka lau afioga. O assets a le SSFA, e ova atu i le \$3 miliona fale sa i ai i luga i ina. Ae avatu le faatonuga a le Malo, ave le afa faaoga i le soka. Na ave e leai se tupe, ave e leai se compensation. O le a le mea lea ua i ai? Talepe i lalo fale ae fai ai le malae soka. E le faapea atu le Matagaluega lenei, o se mea leaga, o le mea lelei. A o fale na fau, na fesoasoani mai ai le Malo o Saina. E le mafai la ona faia faapea aiaiga nei, e tataua ona i ai ni compensation lelei. O la foi e faamoemoe mai le SSFA i le tatou Faigamalo i le grant lea e avatu i le paketi i tausaga uma. A ua tataua ona faamautu ni lisi mo le SSFA, aumai e le SLC ia fanua ia, ao e latou lisi, totogi mai ma tagata latou te faaogaina. Ae o le faalavelave, e ave i i, toe avatu le isi FK, toe ave i o, toe aumai le isi FK toe aumai i i. E alu ai lava faapenei.

Lau Afioga i le Fofoga Fetalai, ua tataua ona fai se aiaiga lelei ina ia faamautu ese ai le SSFA, mai lisi o lo o i ai le SLC ona ua feteenai i le taimi lenei. O lo o ua i ai foi se fuafuaga ua uma ona fai le fale i luga o le Archery, Fanafana au, na fau e le SSFA le fale, ae o sao le Archery, e manao e fai e le SLC le latou lisi. E faapefea assets ia ua uma ona fau e le SSFA? O le agaga la lea e i ai, e tataua ona aumai le lisi i i i le SSFA, ao e latou ma claim ai asset. A leai ona totogi sao mai lea e latou o lo o lisiina fanua nei.

Ua ala ona oo i ai se faamatalaga lau afioga i le Fofoga Fetalai, ina ia taumafai e galulue faatasi Matagaluega o lo o i ai, a o Matagaluega uma lava i lalo... o le taimi lenei.

Lau Afioga i le Fofoga Fetalai, e pau ia o nai mataupu, ona ou oo mai lea i le tulaga o le....

**Afioga Hon Lautafi Fio Selafi Purcell:** Lau Afioga i le Fofoga Fetalai pe maua se avanoa...

**FOFOGA FETALAI:** Malie lau Afioga i le Minisita, sa lauga lau Afioga i le...

**Afioga Hon Lautafi Fio Selafi Purcell:** Ia faafetai i le Afioga i le Minisita, leaga o mea uma sa ou talanoa i ai lau Afioga i galuega faavaitaimi, ma tulafono ia sa tau nenefu ai Olo i lou fai atu po o le a le tulafono lea... mea ia o investment. E saolele le Afioga i le Minisita i le tatou galuega faavaitaimi, ua i ai nai faafitauli laiti. O le mea foi lea sa fai, sa toso mai faifeau ma pulenuu i totonu e faamaonia tagata o latou nuu. O mea uma ia na fai muamua foi. Ua fai foi ua fai mai foi, ua na o le aiga o le pulenuu, ua na o le aiga o le faifeau lea e manuia i nei mea. Ae faafetai o lea ua fai le review, ae na amata lava le review e le i o ese le Faigamalo lenei sa faatonu e fai. E faapena foi la le Tulafono lea o le Citizen by Investment, atonu e te afio atu foi lau afioga, ua leva ona i ai lau faatonuga i le Matagaluega, review le Tulafono lea, ona e le o i ai ni tagata o omai. Ae peitai ane, e pei lava... o le fesoasoani a Ausetalia lenei e fund ai, e faigata ona sau le consultant faapitoa lenei, ona o le Koviti-19, ae faafetai o lea ua tilotilo i ai, o se mea ua tataua ona fai.

Faafetai o lea ua faalogologo atu, ae manatua foi lau afioga i le Minisita, na muamua lava ou talosaga atu i lau afioga i se isi Liaison Officer, aua e le taitai ona lava le toatasi lea sa i ai, e oo foi i le toalua pe toatolu. E leaga e tele le mea lea ua agai i ai tatou tagata faigaluega, e sao ai, e mai lava i Victoria e tau i luga i North Territory, e tele tele le... Ae sa ou faapea lava au e saunoa mai o la ua agree Ausetalia latou te fund ina se isi tagata. O lea na ou fai atu ai, e toe taumafai i ai, e fund e latou i tausaga uma oi luma, ae le na o le tasi foi le tausaga lea e faapea e... pe tumau lava lenei mea, pe ua toe me i foi Ausetalia ina ua ese le latou Faigamalo. O nai manatu na, ona o lea sa... o le a ou le oo lava i mea ia o le SSFA ona e fai lava si lavelave. Ou te alu atu foi o la e lavelave atoa lava ma isi fanua e le o faaogaina, ae faafetai o lenei mea ua fai lelei ni lisi, e maua ai ni tupe a le SSFA latou. Ma le faaaloalo.

**FOFOGA FETALAI:** Ia malo faafetai, lau afioga i le Minisita faaauau mai lau saunoaga.

**Tofa Hon LEATINUU WAYNE SOOIALO:** E faafetai atu lava, e maumau e pe ana faapea ni faaiuga e mafai ona fai toatasi e le Minisita. O

lena e te silafia lelei lava lau afioga, e tele le taamilosaga. E faamoemoe foi i le Foreign Affairs ona o le va ma atunuu ia, ina ia mafai ona fesoasoani mai i ai. Ae faafetai lava, o lea lava ta te o tutusa ai lava i i i le tulaga lea lau afioga.

Ona ou oo mai lea i le Samoa Airways, talofa e i le Samoa Airways, talofa e i le aufaigaluega. E ese ma le faigata o faaiuga fai e aafia ai aufaigaluega, aafia ai Kamupani. Lau Afioga i le Fofoga Fetalai, ou te tuuina atu lenei faamatalaga e tusa ai foi ma finagalo na faaalia, e sui usufono mamalu o le Fono Aoa, e faasaga i le kamupani vaalele o le Samoa Airways. E faapea ai foi ma le toe faafoiina o le vaalele. O lou naunautaiga ina ua tuuina mai le Kamupani vaalele i lalo o Faalapotopotoga o lo o ou vaaia, o le faamuamua ia ave i le faamatuuina o tulaga o lo o i ai faamatalaga o tupe a le Kamiupani, e ala i ana tupe maua ae faapea foi i ana aitalafu, ia mautinoa ma malu puipuia asea o lo o i ai, aemaise vaega o le Kamupani e ave i ai le faamuamua, i ana tupe faaalu. Mataitu aafiaga o le Malo, i lona tamaoiga aemaise le aafia o isi Faalapotopotoga a le Malo o lo o tuuina atu nonogatupe i le Kamupani faapea foi le aafiaga o pisinisi tumaoti lau afioga.

O lenei fuafuaga, na toe iloiloaina ai e le Kapeneta ma lana Komiti Faapitoa, na filifilia tulaga ua oo i ai aitalafu a le Kamupani ao le i lisiina mai le vaalele. Ae a aumai foi le vaalele, po o a ni tupe faaalu ma ni aitalafu e ono faatinoina, e fesoasoani ai le faafaigaluegaina o le vaalele. O lenei la iloiloiga na faamautuina ai le finagalo o le Kapeneta ina ia faamatuueseina le lisi mai o le vaalele, ma toe faafoi atu ai le vaalele i le Kamupani, e ona ia fuavaa na lisiina mai ai le vaalele.

O te fiafia e faailoa atu, o le aso 4 Iuni 2022, na faamaeaina ai le feutagaiga a le komiti filifilia a le Kapeneta mo le toe faafoiina o le vaalele ma le Kamupani na lisiina mai ai le vaalele. O lo o i ai foi se vaegatupe ua malilie ai le Kamupani e ona le vaalele ma le Komiti filifilia a le Kapeneta, ina ia totogiina atu mo le faamutaina o lenei lisi, ae le i maea le tausaga o le lisi.

Lau Afioga i le Fofoga Fetalai, o maliliega na lisiina mai ai le vaalele mo le valu tausaga, ae ua maea nei feutagaiga a le Kamupani ma le tatou Komiti filifilia. Ma ua faamatuu atu ai le vaalele faapea ma noatiaga, sa noatia ai tatou Kamupani aemaise le Malo e tusa ai ma lana faamalumaluga o lenei maliega mo le valu tausaga, po o le Government guarantee i le valu tausaga. Ona o tulaga maaleale o le maliliega ma le puipuia foi o le aufaisea a le Kamupani, na lisiina mai ai le vaalele. E pei ona masani ai feutagaiga faapisinisi faava-o-Malo o le lalolagi. O se tasi vaega o le maliliega, ina ia taofiofi le faalauiloa o faamatalaga o lenei maliliega, seia maea ona faamautuina le totogiina atu faamutaina o le lisi.

Ou te talosaga atu ai i lou ava ma lou faaaloalo i sui usufono mamalu uma o le Fono Aoa Faitulafono, ina ia tatou aloaia ia maliliega ua faia nei. O se aso oi luma ona faailoa atu lea e le Malo nei fuafuaga uma mo le silafia e le mamalu o le atunuu. Ae ou te fiafia e faalauiloa atu lau afioga i le Fofoga

Fetalai, ma le mamalu o le Fono Aoaofaitulafono, e tusa ma le 90% le aofai o tupe ua faasaoina mai i le toe faafoiina o le vaalele, pe a faatusatusa i se tupe fuafuaina, e tusa ma le \$160 miliona, pe afai e toe faafoi le vaalele i fuafuaga a le Malo talu ai.

A o faatautaia feutagaiga mo le toe faafoi ai o le vaalele, e tele lava ni faafitauli na aliae mai ai i le tatou Kamupani. O le 2019 lea na gata ai ona sueina tusi a le Kamupani, ae momoli lava lau faamalo i le Komiti filifilia a le Kapeneta na feagai ai ma le galuega taua. Ua mafai ai nei ona toe faafoi le vaalele ma tausailia auala e fesoasoani e faaititia ai aitalafu a le Kamupani. A o tausaili foi nisi faiga faapaaga, e fesoasoani mo faigamalaga a o tatou tagata i Samoa ma atunuu e mamao. O lo o i ai foi se faamoemoe i lea lava Komiti, ina ia faataunuuna i se taimi vave lava, le sueina o tusi o le Kamupani mo le tausaga faaletupe 2020 ma le 2021 ae tuuina mai i le Fono Aoaofaitulafono mo le atoaga o lo o ua i ai nei le pagatia o tulaga tau tupe a le Kamupani.

Mo le silaifa e a outou afioga, o lo o taumafai lava e suetusi o le 2020 ma le 2020/2021. Ona o le tele o galuega na toe fetuunai, ma le le mautinoa o tulaga tau tupe, aemaise ai aitalafu a le Kamupani, na taliaina ai le Kapeneta se talosaga mo le tofiaina o se Komiti Faatonu le tumau po o le Interim Management Board, e faatinoina se iloiloga atoatoa e 300 degrees, o lona uiga e matua toe iloilo atoa le Kamupani, e 360 degrees review, o le Kamupani aemaise o ni faiga faapaaga mo femalagaaiga a vaalele i Samoa ma atunuu e mamao. Ma se i vaavaai foi pe toe alagataua ona toe faatinoina e le Kamupani lea auaunaga, pe faatinoina loa i se faiga faapaaga. Ona o itu tetele nei, aemaise aafiaga o atunuu, ma faigamalaga i tuaoi faava-o-Malo, talu mai le Koviti-19, na faatinoina ai tofiga o ni tamalii, o le tatou lava atunuu ua lava le silafia i ituaiga pisinisi o vaalele savili, aemaise foi le tomai e lalaga ai pisinisi ua gau, e avea ma pisinisi e toe atinae ai le tamaoiaiga o si o tatou atunuu. O le a nafa foi lenei Komiti, ma le sailia o auala e gafatia e o tatou tagata ona faimalaga ai i atunuu mamao aemaise lava Niu Sila ma Ausetalia, o lo o faamaunua ai le toatele o tagata e malaga tafafao mai fafo. O le auga lea o le faamoemoe o lenei Komiti lau Afioga i le Fofoga Fetalai, ma ua latou taliaina foi lo latou tofiga, ina ia lagolagosua mai foi i le galuega a lo tatou Malo, o i ai nei. Aemaise o le toe taumafai e vaavaaia se auala mautu, e siitia ai avanoa e femalagaaia ai o tagata i ni pasese pau ma taugofie. E avea foi lenei avanoa e momoli e momoli atu ai le faamalo i le Komiti Faatonu a le Kamupani vaalele, i latou sa galulue ai, i lo outou taimi taua, aemaise o le faasaoina mai o lo outou tomai ma agavaa i galuega a le Kamupani vaalele.

Apeitai lau Afioga i le Fofoga Fetalai e eseese talitonuga o lenei foi Faigamalaga o i ai, ma le tulaga na i ai. O le talitonuga o lenei Faigamalaga, ia tatou faia se Kamupani e mafai ona toe maua mai ai se polofiti e mafai ai ona faagaioi.

E avea foi lenei avanoa lau Afioga i le Fofoga Fetalai, e talosagaina ai le mamalu o si o ta atunuu, ia lava papale mai pea ma maua le onosai a o taumafai ai lo tatou Malo, e sailia avanoa e fesoasoani i tatou femalagaiga. E le o po le silafia i le siitai o tau o pasese, ona o le tau o le suauu i atunuu o lo o faatauina mai ai le suauu i le lalolagi. E i ai le naunautaiga o le Malo ina ia faamautuina ni faiga faapaaaga, po o ni auala foi e femalagaai ma o tatou nuu tuaoi i se taimi lata mai lava lau afioga i le Fofoga Fetalai. O le faamalamalamaga lea i le tulaga o le tatou Kamupani vaalele.

Ae ao ona ou oo i se mataupu sa laga e Vaimauga 1 ma Anoamaa 2, na fesiligia ai le \$6 miliona o le Vaalele. Lau afioga i le Fofoga Fetalai, e pei ona faailoa atu, o lo o ua faagasolo nei galuega toe atiae a le tatou Kamupani vaalele, lea ua filifilia i ai le tatou Komiti Faatonu le tumau, o nai tamalii o le atunuu ua lava le tomai ma agavaa o pisinisi o vaalele sivili. O le isi a latou galuega tele, ina ia vaai ni auala e faaitiitia ai aitalafu a le Kamupani. Ona o Tulafono Tumau a le Maota, e fia faailoa atu ai i lo outou mamalu, e fai lava si ogaoga o le tulaga ua i ai aitalafu a le Kamupani, ae le o mafai ona faamautu, seiloga e maea ona suesueina tusi a le Kamupani, mo tausaga faale-tupe e 2020 ma le 2020/2021. O lea foi ua amata fesoasoani le Malo i nisi o aitalafu e pei ona i ai vaegatupe e \$6 miliona, lea ua faaagaga i lalo o tupe e avea ai ma sui o le Malo, Matagaluega ma Faalapotopotoga a le Malo.

Lau Afioga i le Fofoga Fetalai, o lea seleni e aofia ai se vaega e totogiina atu o le malaevaalele i Fagalii i le Kamupani. E pei ona silafia, ua faatau nei e le Malo le malaevaalele i Fagalii mai le Kamupani vaalele. O lea la ua amata ona auauai mai le seleni lea, e faagaioi ai ia aitalafu, aemaise foi o nisi gaioioiga a le Kamupani.

Lau Afioga i le Fofoga Fetalai, o lea seleni e aofia ai se vaega e totogi atu ai le malaevaalele i Fagalii i le Kamupani, aemaise o le amata togitogiina ai o aitalafu a le Kamupani i vaalele, e aofia ai ma le faamatuina atu o le lisi o le vaalele. Ona o lo o noatia le Malo i lalo o le maliega o le lisiina mai o le vaalele. E le o mafai ai ona iloa tonu se vaegatupe, ae ua na o se provision, ua na o se vaega, o lo o tuuina i ai le Tala Faatatau o le Tupe mo le tausaga fou. E i ai le manatu maualuga, o le a faaoo mai i le Fono Aoaofaitulafono se faamatalaga o lenei atinae taua pe a tuuina mai le lipoti faale-tausaga a le Kamupani mo tausaga e 20, 2020 seia oo atu foi i le 2022. I lalo foi la o lea vaega, e pei ona silafia, o lo o i ai i latou ua uma ona issue a latou tickets e faimalaga ai, e lavea ai la ma le vaega lea, e toe refund ai tickets ia a tagata, ua uma ona faatauina, ae le i faimalaga lava i le taimi lenei. Ua leva foi ona faatali, nai tagata ia mo refunds ia. I le tulaga foi lea o lo o i ai, e pei ona silafia, sa i ai foi le tulaga e le i totogia lava NPF a le afaigaluega, o lea foi la ua faatinoina lea tulaga. Ae le gata i lea, o lea ua aumai ia le iloiloga mai le Kamupani sa tipi i lalo le 50% o totogi o i latou, sa mafai ona auuina mo le Faigamalo. O lea foi la ua avatu le redundancy ae o lea foi ua toe tipi foi i lalo i le 50%. O lea la e tatalo atu ai i le Kamupani i le taimi lenei, e le

mafai ona afaina faalua se tagata faigaluega, ua tipi le 50% ae oo i le taimi e malolo ai, ae toe tipi ma le isi 50%. O le tatalo la a le Minisita i le Kamupani, totogi uma le 100%, o redundancy a tagata faigaluega nei a le Samoa Airways, ona ua leva ona latou tautua i le Kamupani. Ae i ai le agaga, a i ai se taimi ae toe lelei mai le tatou Kamupani vaalele, ia o le a toe tilotilo foi i ai, o i latou lava ia, e muamua ave i ai le faamuamua. O lea la e tatalo atu ai i le tulaga lea ua i ai, ua tele tusi ua oo mai ia te au, o le faasea mai a le aufaigaluega, e le mafai ona lavea faalua i latou i le 50% o le tipi o le totogi, ae toe avatu le redundancy e toe tipi foi le isi 50%. Lau Afioga i le Fofoga Fetalai, o le tulaga lena e tataua ona oo i ai, o le mea foi lena, o lea e alofa ai i le Kamupani vaalele, ma alofa ai foi i le aufaigaluega.

Ia ona faapea atu lea lau Afioga i le Fofoga Fetalai, i lenei vaega o le aso, e momoli atu ai le faafetai tele lava i Matagaluega e iva, o lo o i lalo o lau vaavaaiga. O le filemu ia, e filemu e pei o le lupe, aisea? Ona o i latou...

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai pe maua se avanoa, se i fai se malologa a le Minisita.

**FOFOGA FETALAI:** Lau Afioga i le Minisita, se i tuu atu le avanoa i le Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** Ua malo le saunoa malamalama ma le manino i le faaaogaina o le \$6 miliona lea e pei ona aumai i le Tala Faatatau o le Tupe, na mafua ai foi ona fesili ma afea i le lauga faalauaitete a lenei foi itumalo. Ua faafetai o lea ua taoto mai tulaga, e tele lava mea ia o le a faapena ona vaevae i ai le \$6 miliona. O se isi vaega o le tau o le malaevaalele i Fagalii, lea ua faatau e le Malo. O se isi vaega o le refund ina o ticket, e masalo o nai tagata foi ia sa totogi tickets ae aafia loa i le Koviti-19 ia tatou le mafai loa ona toe feoi. E faapena foi le taofia o le tatou vaalele ma isi lava vaega o le totogiina o saofaga i le NPF, ae faapea foi le togitogi ina o aitalafu. E pei lava a matau atu, e le lava le \$6 miliona, a o se tupe amata, e tau ina tau amata atu ai lea tulaga. A o lea foi ua manino i le saunoaga a lau afioga i le Minisita, le feagaiga ua maea ona sainia i le aso 4 o Iuni, o lea la ua faamuta uma ai tulaga ia na fuafua mo le vaalele lea sa taumafai e aumai e faaoga e le tatou Malo i le tautuaina o le tatou atunuu. O lea la e matau atu i le Komiti le tumau, lea ua tofia le tumau, o lo o gafa ma feutagaiga i le taimi nei, e iloilo ina atoa ma toe review le Kamupani, ia faapea foi le toe faatalanoaina o nisi Kamupani vaalele e faipaaga. Ona e pei e manino i lau faalogo, e leai se faamoemoe o le tatou Malo e toe aumai se tatou vaalele. Ae o lo o vaavaai nei, i faiga faapaaga ma isi Kamupani vaalele ma isi atunuu. E le toe tau fai atu i lea tulaga o mea foi sa tatou faia muamua. Na aumai muamua foi le tatou vaalele i ia aso, ona muta laia o le faaaogaina, ae fai le tatou osigafeagai ma le Kamupani Xiamen

a Ausetalia, Xiamen Airlines. Ona alu alu foi lea tulai mai faafitauli, faamuta foi lena feagaiga, ae tatou toe foi lava e aumai se vaalele a lo tatou atunuu. Ona alu alu foi lea, muta lena tulaga, ae fai le tatou osigafeagaiga ma le Poly blue ea, po o le a le igoa o le Kamupani, i le vaitaimi o Minisia Tuuu Anasii lea. Sa fai i ai le osigafeagaiga ma le Virgin Blue ea... Ona sosoo atu ai lea pei ua aveese le Blue ae ua ata atu o le Virgin. E pei la o le Virgin lea e mulimuli, talu ai nei, e i ai foi faafitauli na tulai mai, na mafua ai foi ona faamuta lena osigafeagaiga. Aua e pei e foliga mai, e iu ane le... e alu alu le taumafaiga faapenei, ia o le tele lava o tupe lea e alu i fafo i Kamupani vaalele ia, e pei e faaleai se tupe e maua e lo tatou atunuu.

O le matou fautuaga, se i toe silasila lelei ifo ma silasila ane i feagaiga ia, pe a toe fai nisi feagaiga ma nisi faiga faapaaga ma nisi Kamupani vaalele, ia se i aua ne i toe tulai mai tulaga ia. E pei o lea e maua i le faalogo, o isi lava foi lauia o le atunuu lea sa i, i feutagaiga ma faiga faapaaga ma le Virgin, lea foi la e i i, i lau Komiti lea ua toe tofi. Ae tau lava ina faapena atu sa matou faamatalaga, se i silasila lelei ane, ona o mea foi ua tatou foi mai ai, e pei e le o se mea fou. Ae pau la le mea, ia toe silasila lelei i aiaiga o tuutuuga, ma vaega uma faapena. E le faapea foi e tau aoaia e Laupua Tamafaiga, o na e i i na le tofa, o lea foi ua maua o nisi foi o tamalii iloga o le atunuu, i pisinisi tau vaalele. O lea ua tofia e galulue mo le toe taumafaiga ma le toe faaleleia atili o le Kamupani lea, o le mea silisili lena ona taua i le faalogologo atu. Aua o se atinae taua tele, e le toe tau faamamafa lea tulaga, le taua o le atinae a le atunuu. O le taua i le tamaoiga o le atunuu, e taua i tagata uma, o faleoloa, pisinisi ma faletalimalo, ma tulaga faapena. Ia, ma se i silasila lau afioga i se tulaga vave e faamautu ai feagaiga ia, ma tulaga ia, ona o lea e i ai tatou tapenapenaga e pei ona matou taumafai atu. E pei lava o lena e silafia, tapenaga o fonotaga tetele ia, e fougou mai e faatino i lo tatou atunuu. E tasi lea alamanuia tele o le a maua e lo tatou atunuu, fonotaga tetele ia, e pei foi o le fonotaga lea sa i ai, a le SIDs ma isi fonotaga. O le tulaga taua uma ia e pei ona e saunoa i ai. E sao foi lau saunoga, e auai foi i lou finagalo, i le tulaga, o le mea lea e tulai mai, i le tatou export i le tatou vaa, o lea foi sa tulai mai i le isi vaitaimi pe sefulu tausaga talu ai, ua alu alu ua tau leai ni vaa e afea tatou, ua taugata ai le tau o oloa, o le ala foi lea na see ai lo tatou Malo faatau le PFL. E pei o le fofu lena sa i ai i lena vaitaimi, faatau le PFL, ina ia taumafai pea, ina ia aua nei motusia a tatou export sa i ai i lena vaitaimi. E manatua foi sa i ai le tatou Yasaki, ou te iloa e tasi lena export tele, sa ia tatou, ua tapuni le Yasaki ua pau foi i lalo le tatou export, ua atili ai ona pau i lalo a tatou export, ma alu ai foi i luga le tau o freight e pei ona e saunoa, ma le tulaga o oloa e auina mai fafo, ae ua tau leai se tatou export i fafo, ua faaletonu ai le tulaga o le tatou trade. Ae faamalo i le tulaga lea, aua a silasila, i mea foi lea sa naunau ai foi se taofi, o le faatinoga ma le faataunuuga o tatou atinae tetele ina ia toe sii ai i luga

le tele o oloa e aumai i totonu o atinae e maua ai foi a tatou tupe. O isi tupe faaopoopo i tupe maua mai, masani a lo tatou atunuu.

E pei o vaega na, na mafua ai foi ona taumafai le investment lea,... tulafono, o mea foi sa fai i na vaitaimi, ona sa taumafai uma atunuu. E tele atunuu sa taumafai e fai lena tulafono, ina ia tosina ai latou, e omai e faagalulue a latou seleni i totonu o le atunuu mo le atinaega o le tatou atunuu. O se faamatalaga lea lau afioga, ae faafetai o lea ua talia le tulaga lea o le toe faasee pea i tua o le tatou RSE le filifiliga o le au faigaluega i itumalo ma afioaga. E pei foi ona ou taumafai atu i le Tala Faaopoopo o le Tupe, o latou na o la e silafia lelei o latou foi tagata aemaise foi o latou aumaga, e manatu o la e silafia lelei lava. E le pei o le mea lea sa see mai loa i le tatou Matagaluega, ua omai uma tagata mai i ma o o le atunuu, ua le iloa la, ua maua loa i le mea lena, ua oo i faiaoga o leoleo ua omai uma ua apalai i le tulaga lea. Ae pei o lena ua silafia e lau afioga, o le amataga lava ia o le polokalame for unskill labourers. O le mea lena lea na aumai i atunuu ia o Ausetalia ma Niu Sila, lea la e toatele lava la o le auvaega foi ia e leai ni galuega, lea e pei ona e saunoa i ai lau Afioga.

Ae ala atu ai la i i le fesili mulimuli, ona o lea e pei e tau maua o lea e faapea o le a taofia mo se taimi le tumau po o le masina po o le a pe sao pe faamaonia lea tulaga, i le polokalame lea.

Lua o fesili lau Afioga i le Minisita, po ua i ai la nisi kamupani vaalele ua amata ona faatalanoa i le taimi lenei ni tatou faiga faapaaga ina ia tino mai i se taimi lata mai e fesoasoani ai i le tatou atunuu mo le faapauina o pasese ina ia i ai se tauvaga ma le kamupani vaalele lea o le Ea Niu Sila.

Ia pei o nai fesili ia, faafetai mo le avanoa lau Afioga.

**FOFOGA FETALAI:** Malo lava faafetai. Ia, mo le faasaoina o le taimi o lau Afioga i le Minisita, se i tulai mai le sui usufono mo Vaimauga 3.

**Afioga Hon Tapunuu Niko Lee Hang:** Faafetai mo le avanoa. Ia mo le faasaoina o le taimi o le Afioga i le Minisita, leaga sa ou taua i lau lauga le tulaga o le vaalele. Ia o matou na o le faamaite lava, a o lena ua i ina le faimea i lau Afioga. Sa ou taua le tulaga lea o le taua o le i ai o se tatou lava vaalele. O lea la ua aliali mai tulaga o pasese. O lea na fai nei le matou booking lau Afioga i le malaga a le Palemene lea matou te malaga ai i le lua vaiaso o lumanai, toetiiti \$5,000 le pasese o le business class. O tulaga la ia na ou talanoa atu ai i le taua o le i ai lava o se tatou vaalele e mafai ona tatou fetuunai ai i taimi e alu ai i luga pasese, aua o lea o le a dictate mai lava e le Air New Zealand ma le vaega lea o le Qantas a Ausetalia pasese.

Ia ma le isi lau Afioga, sa tatou pologa lava i le taimi o vaalele ia e malaga mai i taimi foi ia e omai i le vaveao, e pule lava latou i le taimi e fai ai latou schedule. Ae pei o le tulaga lea na i ai le tatou vaalele, o le manaia ia o taimi ia tatou te malaga ai i Niu Sila faapena foi le omai mai Niu Sila i Samoa. Ia



pei ona ou fai atu, o matou na o le faamaite lava, pei o tou lauga i mea na e faamaite mai foi, ia o lea foi e faamaite atu tulaga ia. Ae taatia atu i ina, ua uma ona ou talanoa atu i le aoga o le vaalele a tatou, ia ae o lena e i ina le faimea ma le faitonu lelei. Ia na o se toe faaopoopo atu i le tulaga lea, leaga o lea ua taua i le lauga a le matou Sui Taitai le taua lava o le i ai o se tatou vaalele, a o lea foi la e tele nisi mea ta te fia talanoa atu ai, ae taatia ia. Pau lava lena o le mea taua lea ou te toe fia talanoa atu ai, ia aua ne i tou faapea, o lena ua fai mai le tou tala e taofi, a o matou lea e faamaite atu lava. Toe taatia atu e toe fai se tou fuafuaga tatau, ona o le tele o le aoga o le vaalele a tatou, ia fai lava se tatou vaalele mo le agai i luma. Ia ma le faaaloalo lava.

**FOFOGA FETALAI:** Malo faafetai. Ia, se i tulai mai le sui usufono o Salega 1.

**Afioga Fepuleai Faasavalu Faimata Sua (Salega 1):** Faafetai i lau Afioga i le Fofoga Fetalai. E leai se fesili faaopoopo o lea ua uma ona saunoa le Afioga i le Minisita i le tali o le faafesili sa tuuina atu, ma o au foi lea na muamua lava oo i ai le saunoaga a le Minisita anapo. Tau lava o sina mea e faasao mai faamaumauga, ona sa taua e le Minisita o le fanua lea na ou talanoa atu ai o le fanua o le AOG i Salelologa. E leai, e faamalie atu e le o le AOG i Salelologa e ona le fanua, o le Ekalesia Aoao a le AOG i Samoa, a o lea e i eleele i totonu o Salelologa lea e i ai le taulaga. Mo le faamama atili ina ne i aveseseina le faafofoga foi a le Ekalesia, aemaise foi o le Komiti.

Ia o le tulaga lena o lea sa talanoa atu ai, ona o Salelologa e le lavea i nuu o lou itumalo, ae o lo o ou talanoa atu i totonu o le Ekalesia, o lea ua malamalama. Faafetai lau Afioga i le Minisita mo le faamalamalama, ua malamalama le toa lea sa toa ai le Ekalesia, pei o le mea lea sa tau lagona ai sina leo, ua toe fao e le SLC, a o lea la ua iloa, e mama lava le SLC, e mama foi le faigamalo, ae o ni vaega o le Ekalesia ua mafua ai.

Ae o le talosaga i lau Afioga, pe mafai ona toe tuu mai se avanoa e toe faamatuu mai ai lea 7 eka mo le paia o le Ekalesia i Salafai faamolemole. Faafetai mo le avanoa.

**FOFOGA FETALAI:** Ia, malo faafetai. Ia, se i tulai mai Sagaga 2, Tuisamau.

**Susuga Maulolo Tavita Amosa:** Laga le tatou Tala o le Tupe. Ae e leai se mea e sili ona matagofie o se mataupu ogaoga ae manino, fai o le lotoifale o le Palemene, a o le faafofoga tapuai a Samoa, leaga o le mataupu leni na matua lagalaga ai finagalo o lona taua. I le matau atu i leni taeao, aua e tele lava faaupuga ma faamatalaga sa femusuai. O le aso ua faafofoga le atunuu aemaise o leni Maota i e fuafuaga manino ua i ai le Kapeneta ma lena Itu o

le faigamalo. Faafetai. O lea foi ua saunoa atu le Taitai o lenei Itu i sina ootootoga o le talafaasolopito. O mea uma e aoga e fatufatu ai le titi o le Malo ma le tatou Paeaiga lenei, aua le mataupu lenei. Ona faapuupuu atu ai lea o se faamatalaga, o le fuata ma lona lou. O lenei ua i ina le tofa. Afai lava o le a le tulaga e silasila i ai lau Afioga i le Minisita, Kapeneta ma le faigamalo o tulaga ia e manuia ai Samoa, fai lenei ma tatou, matou tapuaia o outou faiva, ua lava ma totoe fautuaga ma tuualalo ua uma ona tuu atu, o fea lava e tau i ai, o lenei. Na pau lava le mea e aoga ai le vavevave, e i ai foi le fesootaiga ma le tatou faamaite lea o le tai \$1 miliona i tulaga o le avega o export ma mea faapena i fafo, ioe, aemaise nai a tatou pasese, aua e i ai le isi ou uso la e tagitagi mai ou te alu atu e totogi le pasese taeao ua fai si taugata. Ia, talosia ia vave taumafaiga. O manu na. ia manuia le alofaiva o lau Afioga i le Minisita ma le Matagaluega aua le tulaga o lenei atinae taua. Faafetai.

**FOFOGA FETALAI:** Malo faafetai. Ia tulai mai lau Afioga i le Minisita.

**Tofa Hon LEATINUU WAYNE SOOIALO:** Faafetai. O le aotelega lea sa saunoa i ai le Afioga i le sui usufono o Anoamaa, o le agaga tonu lava lea e i ai, e manaomia se avefua lelei mo Samoa e le gau ai se atunuu. O aiaiga foi na fai, sa manaia, aulelei le vaalele, aulelei le teine i totonu o le vaalele, aulelei le pasese, ae gau ai le fua lea.

Lau Afioga i le Fofoga Fetalai, o le agaga lenei o le faigamalo lenei, ia aulelei uma mea uma e tau mai lava... Ua leva ona ave e le tatou kamupani vaalele le tatou fua, ae se paga, sa ou faigaluega foi i le Polenisia, lea e alaala atu Laauli o ia sa faaputua lisiti a le kamupani vaalele i lenei vaitaimi, sa amata ai lava ona faaletonu mai i lenei vaitaimi. Na faaletonu foi i le taimi na ou i ai. Aisea? O le 90% o le vaalele e o ai pasese, e maua i le mea lenei, o le FOC, Free of Charge. E le i popole i ai na o le tufa lava.

O le mea la lea ua manumanu ai au nei lea e faaumiumi ai se faamatalaga, manaia le aotelega e le Afioga i le sui usufono o Anoamaa le agaga o le kamupani vaalele na i ai, ae peitai, e manaia aiaiga. O i nei lava i le Maota lenei lea sa saunoa ai le Afioga i le Palemia sa i ai muamua i le mafuaaga na ala ai ona toe aveese le aiaiga mai le Virgin sa maua mai ai le tatou tupe, a o le faalavelave sa totogi ai foi ma aitalafu a le Virgin i o. E le aoga la ona tatou taliaina ni faiga faapaaga faapea e faaoleole mai tatou i tamai tupe ae ave uma tupe i fafo. Le la sa sao ai le aiaiga lenei i lenei vaitaimi, vagana ai lava nai aiaiga ia sa i ai le Malindo. O le Malindo lea na tatou matua tigaina ai lava. Ae o le a le toe foi i tua se faamatalaga lau Afioga. O lo o tausaili e le tatou faigamalo i le taimi lenei se isi vaalele lelei e alu ma le fua lea ina ia maua ai se tatou polofiti. Faafetai foi i le Afioga ia Papalii po o Tapunuu. O lenei e te manumanu i le pasese taugofie, ae o lea matou te popole i le

faateleina o le gau o le kamupani vaalele pe a aumai se tatou vaalele. Atonu e i ai se taimi.

Lau Afioga Salega, faafetai mo le talosaga. Ia o le AOG lava e tasi, o le iuga foi lava e tasi, ae a faapea tou te toe mananao i le fanua, tou te toe omai e avatu le fanua.

Lau Afioga i le Fofoga Fetalai, faafetai mo lou taimi, ia manuia lava le fonotaga. Soifua ma ia manuia.

**FOFOGA FETALAI:** Malo faafetai. Ia o lea ua faaiu mai le saunoaga a le Minisita.

**Afioga Hon Tapunuu Niko Lee Hang:** E faamalie atu i lau Afioga na ona ou fia faafetai lava i le Afioga i le Minisita pe maua se avanoa.

**FOFOGA FETALAI:** Ia saunoa ia, faigata tele oe le alii matua.

**Afioga Hon Tapunuu Niko Lee Hang:** Faafetai. Leai e faatauaina lau saunoaga i le mafuaaga ua le talia ai e tatou le vaalele, ona e te manatu i le tele o le tupe lea ua gau. Ae na ona ou faapea atu i lou malamalamaaga i mea nei o kamupani vaalele, o le umi ia o tau sue se polofiti. E le gata i le taugata o le vaalele, a o le vaaiga foi la o tagata faigaluega. Masalo pe 20 tausaga faatoa maua sina break even. Ae o le tulaga lava lea. Ae ona o le taua lava o le i ai o se tatou vaalele lea e tuualalo atu ai ma avatu ai foi ma faamaite atu ai i lau Afioga, na ona tagatagai ane i ai pe o se tulaga e vave ona maua se tatou vaalele. Aua lau Afioga, e le mafai ona tasi se vaalele, e tataua ona lua vaalele. Aua a gau mai le vaalele e tasi, e toe alu foi tupe e toe charge ai se isi vaalele ma toe alu atu ai nisi polofiti ua maua. Ae pei o le tulaga faigata lena, e tataua ona lua ni vaalele, ae taatia atu i lau Afioga i le Minisita o oe foi o le Minisita e ala le mafaufau ma e talavou, ae taatia atu i lau Afioga. Faafetai.

**FOFOGA FETALAI:** Malo faafetai. Ia se i tulai mai lau Afioga i le Minisita.

**Tofa Hon LEATINUU WAYNE SOOIALO:** Lau Afioga, ia leai, ua lava ia le tali mulimuli lea a le Afioga ia Tapunuu e faaiu ai le lauga a lenei vaega o le aso. Faafetai lava mo le avanoa.

**FOFOGA FETALAI:** Ia, malo lava. O fautuaga lava mo le agai i luma o le atunuu ma fuafuaga tataua. Ae aua e te popole Tapunuu ia o la e lava ua... Masalo e faamalieina lou finagalo pe a lauga mai le Minisita o Galuega Tetele, ou te iloa o le tasi lena fesoasoani tele mo le mataupu lea e te popole i ai. O le mea lea, ia malo faafetai.

Faafetai i lau Afioga i le Minisita o Pisinisi, Alamanuia ma Leipa, e tele Matagaluega o lo o i lalo o lau vaaiga. Ae pei lava ona faafetai atu le tatou Maota, malo, malo le galue. Malo foi le silasila mamao aemaise foi o le auiliiliina o saunoaga i totonu o le Maota, ua matua manino ai lava le Maota aemaise o le faafogafoga mai a le atunuu. O le mea lea, ia malo le fai o le faiva, malo le galulue, malo foi le onosai ma tauatiae aua le manuia o le atunuu.

O le mea lea, ia malo faafetai i lau Afioga faapea foi Matagaluega o i lalo o lau vaavaaiga, malo le galulue. Faamanuia pea le Atua i tiute ma faiva ma galuega o faafeagai ai.

Ia, talu ai o lea ua tatou oo mai i le tatou taimi malolo, e i ai le manatu lau Afioga i le Minisita o Galuega Tetele, se i tatou taliu mai i le tatou malologa masani o le taeao, ona lafo atu foi lea i lau Afioga, atonu e faamalieina ai le tele o isi fesili lea na fotuai mai i le tatou talanoaga i lenei taeao.

O le mea lea, o le a faataatiaese galuega a le Fono Aoa mo lana malologa masani o le taeao.

*Na faataatiaese Taulumaga a le Fono Aoa Faitulafono mo lana malologa masani o le taeao i le itula e 10:45 i le taeao ma toe amatalia i le itula e 11:18 i le taeao.*

**FOFOGA FETALAI:** Ou te faasilasila atu ua toe amatalia nei Taulumaga o le Fono Aoa Faitulafono.

I le toe taliu mai ai o le tatou malologa, ou te talitonu ua maua se faasiligamalosia i le paia o le Palemene. Ua maea le faamalosiga ma le taligasua, malo faafetai i le tatou Ofisa mo gasesega o le taeao, faamalo foi le onosai i le tatou Maota.

Ou te tapa lau Afioga i le Sui Palemia mo le lafo.

## **LAFO MO LE SUIA O ITULA FONO**

**Afioga Hon TUALA TEVAGA IOSEFO PONIFASIO (Sui Palemia):** E faafetai i lau Afioga i le Fofoga Fetalai, e manatu o lea ua maea paleauau le tautea, a o se taumataga foi i le Maota. Faamalo faafetai i lau Afioga ae faapea foi le tatou Ofisa nei mo le tapenaina o le faamalosiga malosia o le Palemene i lenei taeao.

Lau Afioga e matau atu e le o toe tele se vaega o le tatou galuega o lo o totoe. E mo le silafia foi e le tatou Maota, o lo o i ai le faamoemoe e malaga atu lau Afioga mo fonotaga faa-Palemene a le tatou lalolagi. E i ai le

talitonuga e manaomia se laolao e tapena ai lau Afioga mo lea faamoemoe taua o le tatou Palemene, aemaise foi ua utiuti le taimi lau Afioga.

Ou te tulai ai ma le faaaloalo lau Afioga e faatu le lafo, *Ina ia faataatiaese Tulafono Tumau 32 mo le suia o a tatou Itula Fono mo le Aso Fono lenei e faapea, o le a faaauau pea a tatou Tualumaga seia aulia le itula e 1:00 i le aoauli nei ona faataatiaese lea mo se malologa ma toe faaauau ai i le itula e 2:00 i le aoauli, ma faaauau ai seia maea le faitauga faatolu o a tatou Tulafono Tau Faaofi o lo o soalaupule nei.*

O le lafo lea ma le faaaloalo lau Afioga.

*Faaluaina e le Afioga i le Minisita mo Faatoaga ma Faiga Faiva.*

*Na faamaonia le lafo.*

**FOFOGA FETALAI:** O le a faagasolo le tatou galuega e tusa o le lafo ua faamaonia.

E faataatiaese tatou galuega mo le malologa o le taeao ua maea le saunoaga talifuaitau a le Minisita o Pisinisi, Alamanuia ma Leipa, ma o lea ua oo mai le faasologa i le saunoaga a le Afioga i le Minisita mo Galuega, Felauaiga ma Atinae Eseese.

Ma le faaaloalo ou te tapa lau Afioga mo lau saunoaga.

**Tofa Hon OLO FITI AFOA VAAI (Minisita mo Galuega, Felauaiga ma Atinae Eseese):** Faafetai i lau Afioga i le Fofoga Fetalai. O lea ua uma le faaoso o le matou 4x4, o lea ua oo mai ia te au le fua. Faafetai.

Ma e avefa lenei taimi ou te faatalofa atu ai i lau Afioga i le Fofoga o le Fono, lau Afioga i le Fofoga Fetalai o le Maota. E faatalofa atu foi i lenei Itua i lau Afioga i le Sui Taitai o le Itua Agai ma le mamalu o sui usufono o le Palemene.

E faapea foi ona ou faatalofa atu i lau Afioga i le Tamaitai Palemia, ia o lea ua fai au ma fofoga o le Maota nei e faafetai ai i le Atua o lea ua toai i fanua lau faigamalaga. E avatu lava le faamalo i lau Afioga i le tele foi o tiute sa faapena ona auai ai lau Afioga i va faa-Malo, malo le soifua manuia, malo foi le folau.

E faatalofa atu i le Afioga i le Sui Palemia ma le mamalu o le Aiga Kapeneta, e faapea foi Minisita Lagolago o le tatou faigamalalo.

E manatu lau Afioga i le Fofoga Fetalai o lea ua taoto i liu le atumua a le tautai i le tatou taulaga siitia i le taeao ua sola e aami ai le mana ma le Agaga Paia o lo tatou Atua i le tatou fonotaga i lenei taeao matagofie, aemaise ai foi o Lona agalelei ma Lona alofa faasafua i le tatou atunuu, ma le taitai mai foi o lou soifua ma so matou ola, aua le tatou valaauina, lea la ua tatou feiloai ai i magafetau o le soifua i Lona agalelei.

Le paia ma le mamalu o le Tafatolu o itu maualuluga o Samoa lau Afioga i le Fofoga Fetalai, i ona tulaga faalupelupeina, i ou mamalu faale-Ekalesia, mamalu faale-atunuu ma paia faale-Malo, e i ai le manatu e le toe mafai ona faafuluina i sa matou tala paia ia, o paia ua uma ona aisa, ua maea foi ona mamanu faatiti i tuua ua faailagi lo latou soifua.

A o le agaga faaaloalo lau Afioga i le Fofoga Fetalai ma le paia o lenei Maota ou te tulai atu ai e taumafai atu se sao o lenei itutino o le tatou faigamalo. Lau Afioga i le Fofoga Fetalai, ia, o le paia maualuga o sui usufono o lenei Palemene sa afea lenei vaega i a outou faaaliga o outou finagalo, e le gata i manaoga masani o itumalo taitasi, ae faapena foi i tuualalo taua ma faamaite taua e pei ona i ai le aso.

O le upu moni lava lau Afioga i le Fofoga Fetalai, ia, e leai se atoatoa ia te au nei ma Afioga i Minisita Lagolago nei, ae tainane foi se auaunaga i Ofisa Sili o Pulega o Matagaluega, o Sui Ofisa Sili o Pulega o Matagaluega, o tupu ma ee o lo o galulue i lenei vaega tele tele lava, ae tatou faamoeemoe pea i le Atua e aumaia le potu e mafai ai ona faatino le matou auaunaga.

Lau Afioga i le Fofoga Fetalai, a o le i oo atu lava se matou tala i mataupu sa laga mai e Afioga i sui usufono mamalu o le Maota, e muamua lava ona avatu se matou faafetai tele i a tatou paaga masani, e le gata i Faletupe o le Lalolagi, a o atunuu foi, e pei ona i ai le Malo o Saina, le Malo o Iapani, Niu Sila, Ausetalia, ma faletupe o le World Bank ma le ADB, ia ma isi lava paaga e le o maua ia te au i lenei taeao. E momoli atu le faafetai tele i lo outou agalelei ua mafai ai ona faatupe atinae tetele e pei ona i ai le auauna nei.

Ae momoli atu foi le faafetai tele i a tatou konekarate a le tatou atunuu i o latou foi sao taua, aua a le seanoa la outou foi pitolaau, e le mafai foi ona faatino tulaga ma manaoga o le Malo e tauala atu i pulega o lo o i totonu i lalo o lau vaaiga. Ia manatua foi lau Afioga i le Fofoga Fetalai, e 9 foi Matagaluega tetele o lo o i totonu o lenei Sector. O lo o i ai le Samoa Airport Authority, LTA, Pulega o le Suavai, o le EPC, o le MWTI, o le Samoa Shipping Services, Samoa Shipping Corporation, o le SPA, o le PFL. E matua tau le lelei ai sau moe i le po i le tetele o nei mea. Ae ui i lea, e faatino lava le tautua aua lo tatou atunuu.

E faapitoa lava lau faafetai tele lau Afioga i le Fofoga Fetalai i lou uso a sui usufono le Afioga ia Papalii po o le Afioga foi ia Tapunuu, o le sa tu i le foe i lenei foi galuega e le faigofie. E avatu lava lau faamalo i lau Afioga, e ui lava ina e faamaite tetee mai, ae ou te fiafia lava, ona o le tele o lou sao, ia ma galuega lelei foi sa feagai ma lau Afioga. Ia o lea foi la ua ou taunuu mai, o lea lava ou te mulimulitai i nisi foi o au fuafuaga sa faataoto mo le lelei o le tatou Malo ma le atunuu atoa. Faafetai lava i lau Afioga.

Lau Afioga i le Fofoga Fetalai, e tele finagalo faaaliga, e le gata lava, e moni lava i tulaga foi o lenei vaega, itutino o le Malo i tulaga faaletonu o i ai ni nai auaunaga, e le gata foi i lena o lo o atagia mai foi le tulaga ua pau tupe

maua i lenei vaitau o le tausaga. Ae ioe lau Afioga i le Fofoga Fetalai, e le alo lava le Minisita lenei ma le Vaega lenei i se ata o se laau. E moni, ae talitonu lava, o lo o outou silafia uma lava le tulaga e pei foi ona agiga i nisi o saunoaga ma nisi o fetalaiaga, o le tulaga lava i le vavao lea sa feagai nei ma tatou, ma o lo o tatou feagai pea. A o le agaga lava lau Afioga, e le nofonofoa ai le auaunaga lenei, o lo o tulimatai pea le tulaga o se faiga lelei e faatumauina ai pea le soifua gafatia o le mamalu o le tatou atunuu, aemaise foi so latou soifua fiafia.

E i ai lava le talitonuga, talosia, tatou tatalo faatasi ia mamao le tatou atunuu ma ni mala faalenatura ina ne i toe faaopoopo mai foi i le tulaga pagatia e pei ona i ai lenei vaitau i si o tatou atunuu ma le lalolagi atoa.

O saunoaga i Afioga i sui mamalu lau Afioga i le Fofoga Fetalai, ia te au lava ia, e leai se finagalo ma le tofa faaalua e le taua i le faalogologo atu. Pau lava lea lau Afioga i le Fofoga Fetalai, ona o lea sa agiga foi ma ua e musumusu mai e faapuupuu lau tali aua e tolu aso ou te tali ai. Ia, talu ai o lea e pei ona saunoa le Sui Palemia, o le a e tuua le tatou atunuu taeao mo fuafuaga foi faale-Malo, ia o lea o le a ou taumafai ai e faapuupuu atu se matou tapenaga.

O le a ou amata atu lau Afioga i le Fofoga Fetalai i le Pulega o le Malae Vaalele Sivili. E le o toe po se lilo i tulaga e pei ona i ai le vavao, ua matua pagatia lava lenei Pulega i le leai o ni Vaalele. Ae ou te faafetai atu i le Afioga i le Taitaifono ma le Komiti Faafae, aemaise o le Afioga i le Ofisa Sili o Pulega ma le au galulue foi a le tatou Pulega i le taumafai pea e sailiili ni nai seleni e faatupeina ai, e le gata i totogi o le aufaigaluega, a o le taumafai pea e faatumauina le lelei o le tausaiaina o le tatou malae vaalele aemaise o le tatou fale faatali pasese po o le tatou terminal i Faleolo, e talitali ai se taimi e toe tatala ai a tatou borders.

Aua lau Afioga i le Fofoga Fetalai ma le mamalu o le Maota, na pau lava ia o vaega e maua ai ni tupe maua a le tatou Pulega o Malae Vaalele, na o le agai mai o vaalele i landing fees ma isi uma mau mea, ona faatoa maua lea o se tupe. Ae o le agaga faafetai lena i le Afioga i le Ofisa Sili o Pulega, faapea foi le au tautua o le tatou Pulega.

Lau Afioga i le Fofoga Fetalai, e i ai nisi o mataupu na laga mai e le sui usufono mamalu i le tamaitai sui usufono mo Aleipata Itupa i Lalo i le tulaga foi lea o le toe fausia o le malae vaalele pe faaauau le malae vaalele lea i Tiavea. E i ai foi le tulaga sa tatalo mai ai le sui usufono, si ou uso i Vaimauga 1 i se fetuunaiga i le malae vaalele lea i Fagalii. O le a ou tali atu muamua i le malae vaalele lea ia Fagalii. O lenei malae vaalele lau Afioga i le Fofoga Fetalai ma le paia o lenei Maota, ua faafia ona fai i ai tonu. E le na ma le laina lo outou faafofoga foi i lenei vaitau, ia na amata mai i le Pulega o Vaalele o latou faatinoina lea malae vaalele, e le i atoa se lua tausaga ae toe me i atu i o i le Polenisia. Ia alu alu toe me i mai foi i i le Airport Authority. O le taimi lenei, o lea ua i o i le Matagaluega o Leoleo.

O ituaiga mea ia e atagia ai le le mautonu o se faataotoga lelei o ni fuafuaga tuumamao, ae ui i lea o le a faasee ese ona o lea ua agai i ai le tatou faigamalo lenei. I le tulaga lava ia i le malae vaalele i Fagalii, ou te tau sao atu lava, e tasi lava le kamupani vaalele na mafua ai ona sui i Tiavea le malae vaalele lea i Fagalii, ona e puupuu le landing strip, e le mafai ona tulaueleele ai. A o isi lava vaa ia Twin Otters, o lea sa mafai lava ona tulaueleele i Fagalii. Sa i ai lava le faanoanoaga foi lea ona o tulaga o manaoga ma nisi o mea e faamanuiaina ai tagata lautele ina ua toe aveesea Fagalii. O le mea muamua lava, o le aafia ia o tatou turisi mai Tutuila, e tele lava le aafia o turisi na i le faafaigofieina o femalagaaiga. E manatua foi o lea ou te manatua toetiiti lava o weekends uma e agai mai ai le au taaalo tapolo a nai toeaia i Tutuila e tapolo i Fagalii uma toe feosofi i le vaa toe o i Tutuila. Tasi lena... ua misi ia tatou na mau tupe e tele sa maua i Fagalii. O le isi vaega, o le aufaipisinisi foi a tatou e malaga i Tutuila i a latou pisinisi ma le feoaiga lea i le va o tatou ma Savaii i Asau. Tasi lena vaega ua misi ai le tele o tupe mai le taimi lea sa faatino ai le malae vaalele i Tiavea. Ae pito sili lava ona aafia, aafia le itumalo o Vaimauga atoa i a latou pisinisi sa fai i lena taimi, i faleaiga, sa faafaigaluegaina ai foi le mamalu o le tatou atunuu i Vaimauga atoa e lalata i ina, ua sau ua le toe maua ai ni galuega, o faleaiga, o kamupani taxis ma mea faapena. Ua matua tapuni atoa ona o le lape o le faaiuga lea. Ma ou te talanoa atu ma lou agaga faaaloalo, e toe tatala Fagalii lau Afioga i le sui usufono mamalu o Vaimauga. Tatou toe foi i le mea sa i ai le auro, o lea na tatou o ese ai. Ia, e pei o le tulaga lena.

I le tulaga lea sa saunua i ai le Minisita o Pisinisi, Alamanuia ma Leipa i le tupe lea o aitalafu a le latou Samoa Airways, faamolemole lau Afioga, e tau lava ina faamanatu atu...

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai ona e matau atu o lea ua see ese le Afioga i le Minisita ma le malae vaalele lea i Fagalii...

**FOFOGA FETALAI:** Sa e lauga i ai? Ia se i saunua mai, malie lau Afioga i le Minisita... Lau Afioga i le Sui Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** Ia atonu o se taimi lenei e tuuina atu ai le fesili... Manaia lava le faalogologo i le folasaga a le Afioga i le Minisita i le mafuaaga o Fagalii ma le tulaga o le a toe tatalaina ai. Ae pau lava lea o le fesili, ona o lea sa ou maua le lipoti i le tulaga o le safety ona o lea ou te faalogo atu e le i afea e lau folasaga ma lau saunoga le safety o i i le malae valele lea. Po o ua e maua se faaaliga, a o le a se tulaga foi lele i le saogalemu, aua o le mea lava lea e ave i ai le faamuamua a mea nei o malae vaalele ma vaalele. Safety first. E pei o le tulaga lena.



A o Tiavea ia, aua e tele lava mafuaaga lea na ala ai nei ona fai Tiavea, o se malae foi lea e sili atu le umi, e umi lona runway, e mafai ai ona afea e nisi vaalele tetele atu nai lo Twin Otters. O le vaaimamao foi lea i le lumanai, aua e mafai foi ona faatupulaia ai pisinisi ma tulaga faapena i le la foi itu o le motu, ioe. E mafai foi lava ona tele mataaga ma turisi i o e omai tagata e maimoa ai i o e maua ai foi seleni i le la itu faapea foi le tatou atunuu. A o le tulaga o Tiavea, ia na ala ona ave i ai le faamuamua o le safety. O le safety o Tiavea. O le tulaga lea lau Afioga i le Minisita.

**FOFOGA FETALAI:** Malo. O lea ua maua le finagalo o le sui usufono mamalu, tulai mai lau Afioga i le Minisita.

**Tofa Hon OLO FITI AFOA VAAI:** Faafetai. E taua le mea lea ua fesiligia e le Sui Taitai i le safety. Ou te iloa na pau lava le tulaga o le puupuu o le landing strip po o le malae vaalele lea sa ou taua. Ae o lo o i ai fanua i le itu i sisifo o le malae vaalele lena o le tatou Malo e mafai ona extend mai ai, ia ma faaopoopo atu foi agai i sasae, e lava tele, e fiu e lava atoa le umi lea sa manaomia. O Fagalii foi, pe alu lava le malae vaalele i luga o le vanu ae faa-bridge, ia e au i ai i ina se fuafuaga o lea ua fuafua i ai le Afioga i le Ofisa Sili o Pulega ma le Pulega, ia aua e mama vaalele, e tusa lava pe faapena, ia e maua lelei ai lava. Ae ona o le le fetuunai lava o le tulaga na i ai le fuafuaga.

I le talosaga a le Afioga i le tamaitai sui usufono, ou te faamalulu atu i lau Afioga, leaga o lea sa e agai mai i le mamao o Faleolo e agai mai ai le tou itumalo ia po o Fagalii foi. Lau Afioga, malie, ou te iloa e tasi le pasene o le tatou atunuu lena e ia outou, pe a faasea foi lea i le tulaga mamao, a o le 99% o le matou atunuu o lea o le a matou le fiafia i le mamao o le mea matou te o atu ai. E le gata la i le itu i sisifo atoa o Tumua nei, a o le tatou motu i Salafai, a faapea e omai e fia o i Tutuila, lona uiga e omai pue le pasi i Mulifanua agai iinei i Apia, toe pue le pasi e alu i tua, ia, o le safety la lea e pei ona taua e le Afioga i le Sui Taitai i le mamao o auala, ma le tulaga lena. Ae ou te iloa lava, ia o le a tatou o i le mea foi lele, se i i ai se taimi ona tatou tilotilo lea i le mea e pei ona e finagalo i ai.

Ae mo le taimi nei, o le a ave lava le tatou faamuamua e toe taumafai le tatou atinae lea i Fagalii. Ma le faaaloalo.

Ona ou oo mai lea i le kamupani vaa a le tatou atunuu le Samoa Shipping Corporation. E muamua lava ona ave au e fai ma sui o lenei kamupani e faamalulu atu ai i le mamalu o si o tatou atunuu o lo o femalagaai i le va o Salelolga ma Mulifanua i le tulaga lea o le fetuunaiga o tatou taimi o vaa sa...O le mea muamua lava lau Afioga i le Fofoga Fetalai, e sao ai le saunoaga a le Afioga ia Maulolo, o le tai ma lona taaga, o le lou foi ma lona fuata. O lea lava sa matou tilotilo i le tulaga pagatia lea e i ai i le taugata o le suauu i le taimi nei, o lea la sa tau fetuunai ai malaga ina ai sikuea le

femalagaiga o tatou vaa. O isi malaga lau Afioga i le Fofoga Fetalai ma le mamalu o le Maota, e 5 taavale ae le atoa se 30 o tagata. O lea la sa tau fetuunai mai ai, ma ua i ai foi le latou foi research, e i ai lava aso faapitoa e pisi ai, e i ai foi aso e le pisi ai. O lea la sa tau fetuunai ai. E ui i lea, ou te iloa o lena ua outou fiafia o lea lava ua fai le tou finagalo, e lua tatou malaga mai Savaii, e lua foi tatou malaga atu iinei i le Aso Sa. A o isi la aso, o la e foi ua i ai le fetuunaiga.

O le isi lava itu e ao ona ou tau atu, ona o le tulaga lava lea e matauina lava e le tatou atunuu le fai ma faaletonu tatou sa o lo o faaaogaina. O vaa nei ou te iloa o le Tulafono lava ia a le International Maritime Organization lea o lo o faatulaga mai ai tausaga e ao ona faaaogaina ai vaa, o le 15 tausaga. Ae ou te faafetai lava au i le Pulega lenei i lo latou taumafai pea e tau tausi lava nei vaa ua matutua. O le vaa lenei a tatou e i ai le Fotu, ua toetiiti lava 30 tausaga o tatou faaaogaina. Ia, o lena foi la ua tuu atu le talosaga i le Kapeneta se i toe silasila ifo i se tulaga foi lea e vave ai ona sui mai tatou vaa ia.

O le isi vaega lau Afioga i le Fofoga Fetalai, o Setema i le tausaga nei e taunuu mai ai le tatou vaa fou lea o le Lady Naomi, o le sui o le Lady Naomi I. Sa ou taunuu atu ua Lady Samoa, a o le vaa lava lea e agai i Tutuila, sa faaigoa lava i le Lady Naomi. Ma e pule lava au, o le vaa lea o le a aumai nei, o le a faaigoa lava ia Lady Naomi 60 e faamanatu ai le tatou 60 tausaga. Na pau lava lena o si mea sa tau faaletonu ai lou uso ia Papalii, ia Tapunuu, o lona suia fua o mea ua uma ona faataotooto igoa, o vaa e agai i domestics ma vaa foi ia internationals ia e ave i tua. Na pau la lena o le mea. O le Lady Samoa lava ia i lalo o tatou faamaumauga, e agai i le va o Salelologa ma Mulifanua, a o le tatou Lady Naomi, e agai i Tutuila.

**Afioga Hon Tapunuu Niko Lee Hang:** Lau Afioga i le Fofoga Fetalai...

**FOFOGA FETALAI:** Malie lau Afioga i le Minisita leaga ua taua le suafa o Tapunuu.

Ia, se i saunoa mai lau Afioga.

**Afioga Hon Tapunuu Niko Lee Hang:** Faafetai e le faalavelavea foi le saunoaga matagofie a lou uso ia Olo. Ua ou tulai atu lau Afioga, ona o lea e taua faapea ua ou suia le igoa o le vaa. Leai, e manatua foi le tatou vaa lea ua i ai, ua alu ma le Lady Samoa. O le agaga lena ma le tulaga lena na taumafai e faatutusa uma igoa o tatou vaa, alu le Lady Samoa. O lena ua outou tutu i le foe, e pule lava outou. A toe sui i le Lady Naomi, faafetai. E lelei foi e tautau ai le igoa o le Afioga i le Palemia Tamaitai lea ua... ae aveese la le 60 ae tuu i ai le PM Naomi.

Ia na o se tuualalo, na o mea faamaite, ae fai lava e outou le faaiuga. Ma le faaaloalo lava i lau Afioga.

**FOFOGA FETALAI:** Tulai mai lau Afioga i le Minisita.

**Tofa Hon OLO FITI AFOA VAAI:** Faafetai, manaia lau faamaite. E le tuua ai la PM Naomi ae tuu ai Queen Naomi, aua ou te iloa o le sao lena o le... Ia, faafetai i lau Afioga mo le faamaite mai.

O le isi mea lea lau Afioga i le Fofoga Fetalai, sa tatou talanoa nei ma laga mai e le sui usufono mo Satupaitea le PACER Plus ma le faamoemoe o lea foi atinae i totonu o le Pasefika i mea lava ia o tradings. Ua i ai le faamoemoe o le tatou kamupani vaa, o le a faaavanoa se tatou vaa, ma o la e foi ua talatalanoa i le taimi lenei toeitiiti maea, i le faaaogaina lea o le tatou vaa e tatou te faia ai le kiliva foi lea ma tatou fesoasoani i atumotu ia o le Atu Kuki lea e latalata mai, e le gata i lena, o Toga ma Tokelau foi. O i i le Atu Kuki, e tasi lava le aso tatou te agai ai i i i le latou motu lea o Pukapuka lea e latalata mai. Ia manatua foi, na faaputuputu ai lava lea o Pukapuka, Atiu, Monuea, Militare, Neiafu, Saipipi, e i ai uma lava i i i le pito lea. O lea la e i ai le tatou fuafuaga i le tatou vaa, tuu i ai tatou oloa ona o loa lea e kiliva oloa ia e fesoasoani ia latou, aua e tasi le tatou aso pe vaiaso lava. Ae a agai la latou i le latou main land, ia toeitiiti lava lua vaiaso o agai i ai le vaa aua latou oloa, aemaise lava la i taumafa. Pei e tasi lena o fuafuaga lea ua faatino nei e le tatou kamupani vaa.

Ona ou oo mai lea i le tatou Samoa Shipping Services. O lenei auaunaga lau Afioga i le Fofoga Fetalai, e matautia foi le tulaga o le faatinoina o galuega fesoasoani i le tatou Malo aemaise lava mo tulaga tau tupe maua.

I le taimi nei lau Afioga i le Fofoga Fetalai, e 284 seila e oo mai i le taimi lenei o lo o galulue i luga o vaa foi ia a kamupani vaa tetele faava o Malo, vaa laupasese, e 284 seila. Ae 51 alo ma fanau o le au galulue foi i luga o vaa oloa faava o Malo, ia o se tulaga lelei lea, lea foi e maua mai ai tatou remittances mai alo ma fanau ia, o lea foi e fesoasoani i le tatou tamaoiga. Ae o le tausaga nei foi lau Afioga i le Fofoga Fetalai, e 31 le aofaiga foi o nisi o tagata faigaluega, alo ma fanau i mea lava ia tau seila, o le a malaga atu foi i isi foi avanoa fou ai luga lava o vaa ia.

Ae o lo o faagasolo nei le faatalanoaga ma le tasi o kamupani foi lea a Niu Sila, le Kiwi Rail a Niu Sila i latou inter island ferries foi ia lea e malaga i lalo ma luga i motu e lua, o lea foi ua aumai ai le latou talosaga i ni avanoa faigaluega, tagata faigaluega se toa-30 e galulue mo latou. Faafetai foi i lea tulaga.

O le isi vaega taua i le laasaga ua i ai nei talu ona ou alu atu o lea ua i ai le tulaga foi lea o le tatalo mai o kamupani vaa tetele lava, e manaomia ni tatou kapeteni e galulue i luga o vaa nei. Lau Afioga i le Fofoga Fetalai ma le mamalu o le Maota, ou te molimau atu, o le toatele o tupu ma ee foi o le tatou atunuu o lo o i ai tusi kapeteni. E amata atu lava i le Pule o le Samoa Shipping Corporation, he is a Captain, le tamaloa lea e i i. E oo foi la i le Afioga ia Afamasaga lea e i le Port Authority i le taimi lenei o la e ua harbor

master, tasi lena kapeteni. O le tele ia o kapeteni ia a le tatou atunuu, a o lea na ou sau loa ou tusi i o, aumai ni avanoa e o atu ai kapeteni a Samoa. Ia o lea la ua faasolo le tulaga lena.

Ona ou oo mai loa lea i le mea lea pei ona saunoa foi lou uso a Minisita i le taugata o freights i le tulaga lea. Ma e i ai le faamoemoe ma o lea foi ua faagasolo le faatalanoaga i se matou foi idea e taumafai e aumai ai i lalo le tau o oloa mai fafo. O lea la e faatalanoa nei le taumafaiga foi lea. Leaga o le tulaga lea e i ai i le taimi lenei i oloa aemaise lava Niu Sila lea e tele mai ai tatou oloa, e alu lava le faioloa latou ia book ana ia containers. E oo foi i totonu o le Malo, e control mai e suppliers freights ia i totonu ma vaa. E oo foi la i a tatou tagata taitoatasi, o lo o faapena foi, e uma lava ona tapena lau container e alu sue pe te alu i le PFL pe e te alu i fea. E salalau solo le tulaga o le faiga lena, ma a tilotilo atu le kamupani vaa, e fua le tau i le volume o lau cargo lea o le a aumai iinei. O le faamoemoe la o le tatou Malo lea ua i ai nei lea e tauala atu i le tatou Pulega lea o le Samoa Shipping Services, fai se auala e collect faatasi cargoes ia a Samoa i Aukilani, ona ship mai lea i lalo o le igoa o Samoa, ae le afaina ai, e le afaina ai faiga paaga lava ia a Freight Forwarders i Aukilani ma kamupani faapena i Samoa. E pei o le agaga lena o lea e taumafai, aua e pei e tilotilo kamupani vaa, o ai lava e tele se volume o le cargo ona tuu foi lea i lalo o lana rate e feaveai ai tulaga o oloa.

Ma ou te tautino atu lava lau Afoga i le Fofoga Fetalai, leaga o lea tatou te talanoa i le siitaga lava lea o oloa, ae ou te tautino atu, o le afa o lea siitaga, le 50% o le siitaga lea, e mafua mai i le tau o oloa, le tau o felauaiga o oloa, ma o lea foi la o le a taumafai atu la matou foi pitolaau e taumafai e fai se auala e tau aumai ai i lalo tau o freights e pei ona i ai nei. Ma e i ai le tulaga e pei ona faatino foi e Niu Sila se latou talosaga i kamupani vaa nei, owners o kamupani vaa i se talosaga e tuu ai i lalo freights a Niu Sila ia i latou oloa e avatu i Asia ma tulaga faapena. Sa talia la e kamupani vaa le talosaga a Niu Sila, ona o le tulaga foi lele o le tele o latou oloa, exports e avatu i fafo. Ia ou tago loa uu le telefoni ou vili foi au i ai, pe i ai se possibility foi lea e avatu ai se talosaga a le tatou atunuu i se tau faapau mai lalo o tau i luga o vaa. Peitai lau Afioga i le Fofoga Fetalai, o le tali na aumai, leai, e matou te gau ai ona e leai ni tou exports. Ia o lea la ua tilotilo ai i le tulaga lea e pei ona faamatalaina. Ae a faapea e taumafai atu e le mafai lava ni vaega ia se lua, ia o le tonu sao lava, o le a ou aumaia loa se tatou vaa ae faapipii ai le fua lea e tatou te manumanu ai lea e i ou luma lau Afioga i le Fofoga Fetalai.

Ona ou oo mai lea i le Pulega o Uafu ma Taulaga. E tau lava ina ou faasilasila atu le tulaga lea, o le 2014 sa fai ai fesuiaga a le tatou Malo talu ai ma tuuina atu uafu i Savaii i Saleloga, Mulifanua ma Satitoo, ua tuu i lalo o le vaega a le Shipping Corporation, ae tumau pea le uafu i Matautu i le Samoa Port Authority po o le Pulega o Uafu ma Taulaga. Ia, o lea ua tapena mai le tatou Tulafono e toe sui ai le mea lea. E pei lava ona ou fai atu, o lea

sa saunoa le Afioga i le Minisita o Pisinisi ma Alamanuia i fesuiaiga o mea o eleele, oo mai le malae vaalele o le mea lava e tasi, ua o faapea faasapasui faapea, lea foi la e lavea ai mea ia o uafu. O le a toe faatulaga uma lava le mea e tatau ona i ai, ma o lea o le a toe oo uma lava uafu i lalo o le vaavaaiga a le Pulega o Uafu, ae ave vaa i i i le kamupani vaa.

Lau Afioga i le Fofoga Fetalai, e pei o tulaga na e le o taoto lelei ai fuafuaga ia, ae malilie nai ou uso foi sa outou tautua i i, ia o lea foi ua sui faiga faiga faavae na ina ia toe faatulaga lelei nai a tatou mea.

O le uafu lea i Asau lau Afioga i le Fofoga Fetalai, e pei lava ona i ai le finagalo foi o lou uso a sui usufono le Afioga ia Tapunuu i le tulaga lava lea o le uafu i Vaiusu. Mo le silafia lava e lau Afioga i le sui usufono mamalu, e faigata tele le matou taunuu mai o lo o i ai lava le feteenaiga o le Malo ma le itumalo i le tulaga o le uafu lea i Vaiusu. A o le faigamalo lenei e le gata i le tilotilo i le atinae, ae tilotilo foi i le tulaga o tagatanuu o Samoa ma ni o latou foi manaoga. E faigata lava la le tulaga i le uafu lea, a o le tele foi o le tulaga o se tatou loan e fai ai le uafu lea i Vaiusu. O le mea moni lava e faaaloologia lava e le faigamalo lenei se manatu ma se finagalo o le itumalo. Ia taatia ia mo se taimi i le agai i luma, ae le o nofonofoi la le Pulega i le tulaga o le toe saili o se isi auala. O lea la ua faagasolo, ma o le uafu lea i Asau, na ota sau lava i le 2006 o taulagi lava le faiga o le uafu lea aua se manuia foi o le motu tele i Salafai. Aua o le taimi lenei, a ta tilotilo i le tamaoaiga o Salafai, o le tamaoaiga lava lea mai le 40 tausaga talu ai, o la e tumau ai lava le motu tele i Salafai. A o le taimi la lenei, o le a fai moi lava i Asau, fai moi lava. O lea ua tapena le Matagaluega o Tupe i le aumaiga o le fund lea, o le a fausia ai le tatou uafu lea i Asau, ma o le uafu foi lea it's a multipurpose wharf. O lea la o le a tilotilo agai i ai e fetuunai ai, e le gata e back up ina le tatou uafu international port lea, na o le pau lava lea o le tatou international port, ae o le a fuafua i le tulaga o transshipments mai isi atunuu. Mo le silafia e lau Afioga ma le mamalu o le Maota o lea ua agai uma mai lava transshipments a Fiti ma Toga ia tatou. O lea la ua outou silasila i luga o le uafu, ua matua faulalai vaeatu le paia o le Maota i mea o containers o lea e faaputu i i a Fiti ma isi atunuu ona o le tulaga o le taugofie o tatou i le storage, a ia faigofie ai, ia taugofie le agai foi i luga i Asia ma Amerika tatou oloa nei. E i ai la le faamoemoe o le tatou uafu lea i Asau, o le a ave i ai le faamamafa o se tatou transshipment board, ma e i ai ma nisi atinae tetele foi lea e fai ai i o i le uafu i Asau. O le mea lea sa taulagi faapea o le ava, faapea o le papa lea e... Lau Afioga na alu i ai au suesuega i le papa lea, sa faita lava au ia o le papa lea o se papa uamea la e i Asau, ae tutusa lava le papa Asau ma le papa i Salelologa ma Mulifanua, o papa maa uma lava. Ma o lea foi la ua uma ona agai i ai e faatino le feasibility study a inisia ia na ou sau aumai, ae ese ai inisia ia na tafafao solo lea na aumai e Papalii i totonu, lea la ua o atu siaki, o le faigofie ia o le faiga. Ma o lea foi ua i inei le kamupani latou te faatinoina le ava lea.

**FOFOGA FETALAI:** Malie ia lau Afioga i le Minisita se i tulai mai Tapunuu leaga o lea ua... o Papalii lea e taua.

**Afioga Hon Tapunuu Niko Lee Hang:** Lau Afioga i le Fofoga Fetalai, se i fai se koma a lou uso lea ua tau sela mai le Afioga ia Olo. Ae leaga o lea ua taua foi au e le Afioga i le Minisita, o lea la na tau na alu lana asiasiga, o lau fesili i le Afioga i le Minisita, na e mau i lalo e te vaai i le papa pe sao lau...aua leaga o au na ou mau ai i o. Ma le faaaloalo lava.

**Tofa Hon OLO FITI AFOA VAAI:** Sa ou mau ai, ae ou te iloa e ese le mea na mau ai Papalii, fua i lona le iloa lelei e le malo le papa e vaivai.

Ia, o le isi vaega lau Afioga i le Fofoga Fetalai, e oo foi i le uafu lea i Manono, le tatou motu lea i Manono. Masalo lava o le masina fou lea o le a faatino ai le galuega lena i le mea o le uafu opeopea foi lea, e fetui tonu lava ma latou. Ua leva tele ona taumafai le tulaga lea. O le uafu la lena lea sa i i le marina, lea la o le a ave e faaoga lelei e le tatou motu lea o Manono mo latou. E tatalo atu ai la i le itumalo, leaga o lea e le o iinei le Sui Fofoga Fetalai, ia a o la e faafogafoga mai le itumalo, e tatalo atu ma le agaga faaaloalo, tuu mai pea le uafu lea e faatino e le tatou Pulega o Uafu, ona ou te iloa lava e le gafatia e latou le faiga o ni repairs and maintenance o uafu fou ia, ituaiga fou lea o le a avatu mo latou. A o le terminal lava latou i o i Mulifanua, o le mea lena e patino lava i le itumalo i le latou tausiga e pei ona i ai.

O le isi vaega ia i le proposal lea na avatu lea foi ua faasolo ai suesuega, o le uafu lea, uafu ia, o vaafagota a tatou lea sa ma malaga ma le Afioga i le Minisita o Faatoaga ma Faiga Faiva i le uafu lea i Toloa i gatai o le malae vaalele, pei o i ina lea e tau fuafua ai se uafu e agai uma lava i ai vaafagota. Ia o lea foi e uma talanoa le Afioga i le Minisita, o lea foi ua i ai le latou polokalame i le fund e faatino ai tulaga ia ma le tumu ai fua i luga o le matou uafu na o container oloa e tuu ai.

O le isi vaega lea ou te fia tatalo atu ai, o lea e faafofoga mai le Afioga i le Ofisa Sili o Pulega o Uafu, e pei lava ona faafofoga mai i finagalo faaalua o le Maota nei, o le tulaga lava lea o le taumafai e tau aumai i lalo le tau o oloa. Ae o lea sa ou vaai i le faaiuga o le 2021 i le Tala o le Tupe lena, e \$9 miliona le tupe faasili po o le profit na maua e le tatou Pulega lea o Uafu ma Taulaga. O lona uiga, o le matuai tele lava o tupe a le tatou... Ae mo le taimi nei lau Afioga i le Ofisa Sili o Pulega, a o e faafofoga mai po o e... ia toe fetuunai mai le tau o tatou port charges. Ou te talitonu lava tasi ia... o charges ia ma tau ia, o lea foi e tuu e le aufaioloa i luga o oloa, ma mafua ai foi ona i luga le tau o oloa ma le tau o le soifuaga. Na o se tatalo ma se manatu, ae pule lava lau Afioga. Ae mo le taimi nei, ona e eseese taimi i le tulaga lea.

O Salelologa ma Mulifanua, o tatou uafu ia, e vave lava, o le polokalame lea i le uafu ma le tatou poloketi lea i le uafu i Asau, o lea ua pipii atu ai ma Salelologa ma Mulifanua i lona ugrading i le faaloloto ma tulaga uma faapena. Ia o lea foi pei ona ou fai atu, o lea ua i le Minisita o Tupe le tulaga o le fuafuaga lena i le faatupeina. O Matautu ia, o lena ua outou silasila i ai, ua amata a tatou galuega i le faaleleia atili ma le faalauteleina o lea atinae, e pei ona amata mai foi e lou uso ia Tapunuu, o lo o feagai ai, le Kamupani lea a le China Harbour ma lea foi galuega. O lena foi o le a faapipii ai ma le X-ray scanner mo le vaaia o container ia e aumai. A o faafofoga mai lo tatou atunuu, o le scanner lea e le toe sao ai se laau malosi, e aumai mai i atunuu i fafo, po o a lava, o aisa... o ingredients o aisa ia e pei ona saunoa i ai le toatele o sui usufono, e maua uma lava e le scanner ituaiga mea faapena. Ma e tasi lea atinae ua ia i tatou i lenei taimi e fesoasoani i lo tatou Malo.

Ona ou oo mai lea i i, i le Pulega o malosiaga faaeletise. E tele lava tulaga sa laga e le toatele o sui usufono. I ni o latou moli street lights, ma nai aiga e leo oo i ai le eletise.

Lau Afioga i le Fofoga Fetalai, o le a ou amata atu i le eletise faafouina e pei ona laga mai e le sui usufono mamalu o Samatau ma Falelatai. Sa i ai le fuafuaga faataoto mai a lo tatou Faigamalo talu ai, i le tuliloaina o le selau pasene o le eletise faafouina. Ae ou te taunuu atu o i ai le toa i le poloketi lea. Ae o se atinae taua, o le taua ia o le tulituliga lea ma le fuafuaga sa i ai le tatou Faigamalo. Ae sa toa le galuega lea i lalo o le Komiti o le National Energy faapea e taofi mo se taimi nei, po o le a se tulaga o i ai. O lea ua i luma nei o le Kapeneta ia le talosaga, ina ia toe tatala atoa le atinae lea e tauofo mai ai, pe aumai ai expression of interest, i le tele o kamupani, e o lo o fia faia ni latou kamupani solar, po o turbines or whatever, ia e faatau mai lea o le eletise i le EPC. O lea foi ua tatala atu ai ma le avanoa i le faiga faavae fou lea i tatou communities. E po o ai lava la faalapotopotoga e fia fai ni latou solar po o a lava. O lea ua tatala atu le avanoa e aumai outou finagalo po o ai e fia i ai i i, i le polokalame lea ua tuuina atu. E pei la o le faiga fou la lena, ae manatua e na o le 10% o le 100% o le faiga o le eletise lea, o lea o le a tuu atu i tua i communities, o lona uiga o le first come first serve, ae taua tele le vaega lena. O le isi mea e ao ona faamalamalama atu i le mataupu lea, e le pule lava le communities ia po o fea le mea e o e lau mai ai a latou solar panels pe a faapea o solar mea ia o le a fai. E leai, e avatu i le Matagaluega ma le Pulega ia specs e aumai e oka mai ai ia a outou panels. Ina ia aoga le tupe e alu i le faatauga o panels aua o le toatele o le au faatau panels ia ua i ai. A outou silasila i ai e foliga tutusa, ae eseese le quality o le lelei atoatoa e umi ona faaaoga ma maua ai se tupe a se aulotu po o se nuu po o se alalafaga po o mea faapena.

O le tulaga lena i le tatou... a o le tau o le eletise lau Afioga i le Fofoga Fetalai, o lea ua faamauina le 52 sene i le iunite i le 83 sene sa i ai. ina ua faapau le tatou tau i le 20%. Lau Afioga, ae i ai lava nai faafitauli foi o feagai

nei ma le tatou Pulega ona i le tulaga sa faagasolo ai foi ia renewable energy lea e i ai nei, ua fai lava si tele o tau ia sa tauofo mai ai ia nisi o Kamupani. O le isi Kamupani lea ua 52 sene i le iunite, ae o lea ua tala, pe ua 99 sene ea i le iunite le latou tau. O isi la e i lalo mai po o tulaga faapena, e pei o isi faafitauli lena o lea e faafeagai nei ma le Pulega. O lea ua tuu i lalo e tatou le tau, a o la lava e nonofo i luga i tau taugata mea ia.

I le tulaga ia te au e le i tapena lelei ia le faiga o PPAs agreement sa fai, o le mafuaaga lena. I le fuafuaga la i i, i le tatou atinae lea o le tuuina atu i tua, o le toe aumaiga o kamupani e fai. O le aua mafaufau le Pulega e set se price, set le price e tuuina atu, a latou fia i ai i totonu ma manaomia le atinae, ona omai laia. Ia set le price i lalo ifo o le 52 sene lea, ina ia o, ma i ai se tulaga o se maliliega, ia o faatasi manaoga o le Pulega pe sii i luga pe alu i lalo, ia o faatasi ma finagalo ma tulaga i kamupani.

O le tulaga lea e pei ona sa laga mai foi i dividends, i mea ia o tupe faasili ma mea faapena e tuuina atu i le Malo. Ia silafia foi e lau afioga ma le mamalu o lenei Maota, e tele lava le sao o Pulega eseese i totonu o lenei vaega, o lenei itutino o le Malo. Sa tuu i lalo a latou tau sa i ai i le 20%, e i ai la le EPC. I lou lava manatu lau Afioga i le Fofoga Fetalai, o Pulega ia e moni sa faia faapisinisi le faiga, ae taua ia te au le latou auunaga i le atunuu. Aua o le upu moni lava lau Afioga i le Fofoga Fetalai, e le aoga le ave o le fia miliona i le Malo i le dividend lea, ae lea e faaletonu e le o mumu uma le atunuu i le eletise ma mea faapena. E oo foi la i le Pulega a le LTA, e oo foi i le Pulega a le Suavai. O Pulega uma la ia, e le aoga le ave ni tupe i o i le Malo ni dividends ia, ae faaletonu auala, le feinu le atunuu i e o lo o fia maua le suavai.

O le mea la lea, lau Afioga i le Fofoga Fetalai, e ave lau faamuamua i le mea lea, ia malie le tatou Faigamalo, a ua le oo atu se matou dividend, i le isi lima tausaga, ia malilie, se i faataunuu muamua fuafuaga o le faamalieleina o le atunuu atoa. O nisi o...

**Afioga Lupematasila Galumalemana Tologata Togia Tile Leia:** Lau Afioga i le Fofoga Fetalai...

**FOFOGA FETALAI:** Ia malie lau Afioga i le Minisita, se i tuu atu le avanoa i le sui usufono mamalu o Falelatai ma Samatau.

**Afioga Lupematasila Galumalemana Tologata Togia Tile Leia:** Faafetai mo le avanoa. E leai se agaga e fia faalavelave i le saunoaga matagofie i le saunoga a le Minisita. Ae pau lava o si vaega e fia avatu ai se tualalo, leaga o lea ua see ese le Minisita, mai le taua le taugata o le renewables o lo o i ai nei. Ae pau lava si vaega e fia faamalamalama mo le silafia o lenei Maota aemaise foi o le faafogafoga a le atunuu. E sao le afioga i le Minisita, a o le mafuaaga, na silafia foi le vaitaimi na faatoa amata ai le



atinaeina o le malosiaga faafouina. Sa taugata i le taimi lena, ma sa fua foi le vaavaai i lena taimi i le tau sa i ai le suauu. O le vaitaimi tonu foi lena sa i luga lava le tau o le suauu. A o le faamoemoe o le Malo sa i ai i lena vaitaimi, ina ia mafai ona atinae le malosiaga faafouina e sui ai le eletise lea e gaosi mai i le suauu, e pei o le mafuaaga lena. O lea la ua sau sau ai i le taimi lenei, o lea ua agai ina taugofie le malosiaga faafouina. Ae pei o le tulaga lena, na ala ai ona taugata te isi ia le atinae o le malosiaga faafouina i lena foi vaitaimi. Ma e o le isi lesona sa vaavaai i ai i le taimi lata mai lava. Sa fai ai le tauofoga tele lava... o le silasila foi a le Pulega i lena taimi ma le Komiti Faatonu, e ala ona taugata a tatou renewables ia sa atinae, ona e laitiiti le tatou capacity lea e fai ai le tender. O le econmy of scale, lea la na tilotilo ai le Faalapotopotoga ma le Malo i lena taimi, ia fai se tauofoga tele, aua o le mea moni lena o lea e ala ai ona taugofie le malosiaga faafouina i isi atunuu. E maua le 5 sene le tau o isi atunuu, ona o le tele o le capacity la e fai ai le tauofoga. O lea la sa fai ai le tauofoga talu ai nei, o le tau maualalo lea na maua ai, pe 15 sene ea. Ia aepeitai o lea na saunoa le Minisita, o nai faafitauli i requirements for sovereign guarantee a le Malo, lea foi ua toe poloka ai ia le fuafuaga lea, a o nai lesona uma lava na, o lea tatou te aoao mai ai, e silasila foi i ai le Afioga i le Minisita ma le Faigamalo, i le taumafaiga atili o le malosiaga faafouina. Ae momoli atu le agaga faafetai, o lea ua matau atu, o lea e agai i ai fuafuaga a le Faigamalo.

**FOFOGA FETALAI:** Ia malo faafetai. Lau Afioga i le Minisita.

**Tofa Hon OLO FITI AFOA VAAI:** O tulaga lea i nisi o talosaga a nai aiga ia e mamao ese ma tatou laina i main filters, lau Afioga i le Fofoga Fetalai, o la ua tele aiga ua latou maua le tulaga o le faaaogaina o portable solar power supply. O lea foi e faatali isi oka, o mea o solar e avatu faapipii i aiga, ona latou faaogaina lea, ma faatalitali le taimi e toso atu ai le laina mo tulaga faapena. E faapipii i ai ma lana cashpower, e nofonofa ma tulaga faapena. A oo ina oo atu le tatou laina malosi, ona faapea lea ona tatala mai ia tatou masini ia, ma tuuina atu i nisi o aiga o loo maomao pea ma tatou laina eletise.

O le tulaga lea i le dam lea e i Alaoa lau Afioga i le Fofoga Fetalai, o lea lava e faaauau, o lea ua tapena ia tauofoga i le tulaga lea i le faamoemoe lea i Alaoa. Ona e tele lava nisi o issues, e pei foi ona silafia e le tatou Faigamalo talu ai, ona o lea sa feagai ai foi i mea ia o land issues. Sa ou faalogo i le taimi lena ua lelei, ua taoto lelei, a o lea foi ua toe lagalaga, ina ua oomai foi le Faigamalo fou ua toe i ai foi le tulaga faapena. Ae ou te iloa lava, o lea lava ua taoto i se taotoga lelei. I le tulaga i le dam lea, ua tau faalefiafia ai foi le EPC latou ia, aua o i latou lea e pau i ai le poloketi lenei, ona o si tamai tupe lava o lea e faaoga e le EPC i le mea lea, e maua ai lo latou tamai hydro. A o le tupe atoa lava, o lea e agai i le MNRE. Ae ou te fiafia lava...

e oo foi i le MNRE, e pei e le fia manao e toso atu ia i latou le poloketi lea, a o lea ua ou talanoa atu lau Afioga i le Fofoga Fetalai, o lea ua agai mai, o lea ua i i, le afioga i le Ofisa Sili a le MWTI, ma o lona finagalo lea, aumai loa i lalo o le MWTI le poloketi lea e faaauau. Aua o ia lava sa galue ai, a o galue i le EPC. Ia ma galulue faatasi ai lea ma le MNRE, ae tulei le tatou atinae lea i se taimi vave. O le smart meter lau afioga, o lea ua faagasolo atu le tulaga e pei ona talosagaina. E tatau ona i ai le fuainumera o lau tupe sa ave, ma le fuainumera o au iunite. O la ua faasolo atu le tatou polokalame lene ma se i faa... e pei lava o totonu i i le talafatai o Apia, o lea e agai i ai le tatou polokalamea lea. E faamalulu atu foi ia outou afioga ma le mamalu foi o le tatou atunuu, onao se tuai, ona faatino lea vaega.

Ona ou oo mai laia i le Pulega o Felauaiga i luga o le laueleele, o le matuai tigaina lava o le LTA ia outou afioga i mea o lo o outou finagalo i ai, i auala ma mea uma lava. Ae ou te talitonu lau afioga i le Fofoga Fetalai, sa i ai lou faamoemoe ou te tali taitasi, ae o lea e faamauina, e fasefuluvalu ia manaoga i le LTA. Ae ou te talitonu lava o le a avatu se tali i le aotelega o lauga uma lava lea. ae tasi lava le tali atu, a outou afioga mamalu, o lea ua faamauina uma lava ia a outou saunoaga ma manaoga i auala e pei ona outou tatalo mai ai. O lea ua faamauina uma lava e le tatou Pulega, ma e fai uma lava le tulaga lene... afio maia lau Afioga i le Tamaitai Palemia... e fai uma lava le tulaga e pei ona outou finagalo i ai, ae o le a fuafua lava foi i le tatou faamuamua. Ia toe fua atu i i, i le tatou tupe maua.

Lau Afioga i le Fofoga Fetalai, ona ou taunuu mai lea i le alasima. Ou te talitonu lava o lea ua faamalieina foi ia sui usufono o le Itu i Sisifo. O le tatou motu nei i Tiavea o lea ua faataunuuina lene vaega, i mea foi sa tatalo mai ai i tatou faailoilo, o faapatupatu i tua e lua, o la ua uma ona faatino. O le mea lene e i ai le Matagaluega, o le vave ia o le gaoioi, i le tulaga lene. Ae ou te tatalo atu i tatou itumalo, se i silasila ane i tatou faailoilo, e na o le faaleaga, faaleaga, ou te iloa o la e silafia lelei e Tapunuu le tulaga lene. A faaleaga le sign po o faailoilo, o isi foi tupe na e toe aumai, ma tatou tigaina ai i le tele o tupe alu. O le tulaga i le tatou polokalame lea sa fuafua, le poloketi lea o le faiga o alasima i Lano ma Afega. O lea o le a faasolo le tusiga o... e pei o lea ua faasolo le tender, o lea ua maea ona tusi ata o mea na. E vagana ai Sapapalii o lea foi ua amata ona tusi le design... ona design le galuega lea i Sapapalii.

Lau Afioga i le Fofoga Fetalai, sa alu lava lau asiasiga i Tumua nei, ma sa ou vaai i le faamuamua, i tulaga lava ia i alasima. Sa i ai le manatu i i, e tatau lava ona ave le faamuamua i Tiavea ma le isi tamai alasima lea e i i Lemafa, le single lane lene e i ina. E matautia foi lene, sa tatau ona fai muamua lene alasima. E oo foi la i le faasolo mai i Anoamaa i le tele o fords ia e i ai, ua i ai le fuafuaga o le a teuteu muamua atu lava i Anoamaa ona e tele ia vaitafe. E fai i ai se fuafuaga ma se faamuamua. I tulaga o mea ia o speed humps ma faapatupatu. Lau Afioga e lua tau o ituaiga speed humps, o le faapatupatu

ma le faapatu. O le faapatu lea e i luma i i... o lau lena faasamoaina... i luma la o aoga ma aulotu ma mea faapena, e tuu ai le tama lena o le faapatu. O le tama foi lea e faamaualuga lava, ina ia mautinoa e alu atu le taavale tu lelei, e faalemu. A o le faapatupatu, o le tama foi lea, e na ona slow down lava alu. O lea la e tele lava foi e le o tatou faaaogaina i ine i totonu o le taulaga.

O lea o le a faasolo atu, ou te iloa lava o lea e faamaumau uma lava, e sa talosaga mai i mea na. O luma o aoga, o la ua amata. E pei lava ona outou molimauina, e tatou te talanoa lava i i, a o la ua amata ona alu galuega lena, e pei ona i ai.

O tatou aualagalua lau Afioga i le Fofoga Fetalai, o la ua uma ona faamanino atu, ia mea e gata ai le auaunaga a le LTA, ma le mea e amata ai foi aualagalua ia, farming access road, lea ua avatu i lalo o polokalame o le tai tasi miliona a le itumalo. Ma ou te talitonu lava, e avatu pea sau faamatalaga i le mea lea.

I lau asiasiga i tua i alagalua lau Afioga i le Fofoga Fetalai ma le mamalu o le Maota, le tele o tupe sa faaalu foi a lo tatou Faigamalo talu ai, i le faiga o mea lava ia o aualagalua. Ae ua ou matauina ina ua ou taunuu atu, a maua ni faatoaga lelei i totonu o nuu, pe na o le toa lua toa tolu tagata. Ae ua oo foi la i auala, ua sosolo mai lava le fue mai le isi pito alu i le isi pito, tulou le faafogafoga a le Maota. Ia te au lava ia, ua sili atu lea, le ave i lalo o le polokalame e tasi le miliona, afai lava latou te mananao e fai faalelei le auala, ia galulue faalelei. I le tulaga ina ia faaaoga tatau, ia tupe a Malo lea e agai atu i tua mo a latou atinae.

O konekarate ia moavao lea sa taua foi e se tasi o sui usufono, o lea ua i ai le extension i le taimi lenei, o konekarate moavao, i le taimi nei. Ae pei lava sa avatu sau faamatalaga i le taimi muamua, o lea foi atinae, o le a tuu atu i tua i itumalo i o latou foi eleele ma fai e latou fuafuaga. Aepeitai lau Afioga i le Fofoga Fetalai, ia te au ma lau vaavaai, e le o tapena lelei itumalo i masini e faaaogaina ai. Seivaga o lea ua avatu le latou tai miliona, ona faatoa tapena lea o masini nei e faaaoga, ona tuuina atu laia o le vaega lea i tua i itumalo i se taimi.

Se i ou toe foi tasi lava lau afioga ona ua misi ia te au ia aualagalua. E lelei foi lea, ona o lea sa fesili mai ai le Afioga i le sui usufono Tamaitai o Alataua i Sisifo, i le tulaga lea o le faiga o aualagalua.

Lau Afioga i le Fofoga Fetalai, afai lava ua finagalo le itumalo po o se alalafaga e fai se aualagalua, e aumai lava i i, i le LTA e faia atua le... e vaai galuega faapena. Ona e manumanu foi i tulaga o le... e na o i, i le LTA o lea e i ai inisia faapitoa, e latou te faatinoina ia le tulaga lena. Ia faapena foi ona latou fatino procurement process i totonu i le tender ina o galuega. E faafaigofie uma ai mea uma. E le gata foi i lena, ae toe agai atu e fai asiasiga mulimuli, ia mautinoa o la sa faatino lelei e se konekarate ia le faiga o a outou galuega. Ia atoatoa uma layers o le sub grade, sub base, base course ma le surface course. O mea uma na lea ou te talanoa atu ai, ou te alu atu

e fai uma mea na, ma ou vaavaai ai ia outou... Na e manatua mea na Papalii pe leai?

O le tatou west coast road lau afioga i le Fofoga Fetalai, o lena ua outou silasila ua faaauau atu le vaega lea.

**Afioga Peseta Vaifou Tevagaena:** Lau Afioga i le Fofoga Fetalai...

**FOFOGA FETALAI:** Ua i ai le manatu o le Nofoa, leaga o le ua afio mai le Tamaitai Palemia, o lea foi e matau atu, o lea o le a faagasolo mai fesili, i le Afioga i le Minisita. Ua i ai se manatu, se i faafeiloai muamua le afio mai o le Afioga i le Palemia, ona faaauau ai lea o le tatou mataupu.

O le a faia le leo o le Fofoga Fetalai, e fai ma tofa taumolimoli o le tatou Palemene. E tau ia o se matou gagana e na ona faatuulima ma faafeiloai aloaia atu ai, i le tau manuia mai i fanua o le safolau o lau Afioga i le Taitai o le Malo, lau Afioga i le Tamaitai Palemia. I le lato i le ea, ma le lato i le tai ma le opea i le ala, tulou, o lau afioga ma le faigamalaga. E tatou te faafoi pea le viiga ma le faamanu i le Atua, ona o Lana puipuiga alofa ma Lona aao faaloaloa, sa malutia ai le soifua o lau afioga, a o tatou valavala ai ona o nisi o faamoemoega taua o le tatou Malo.

E talitonu le taofi, e tele puapuaga ma faigata o le ala, i le maatui ma le maagao, ma le maa faalavea-aao sa lamatia ai le soifua. O Lona Agaga lava sa tolauapi i so o se ala, sa uia, viia le Atua i Lona agalelei. O Fonotaga faava-o-Malo sa feagai ai, ua faamalo le usufono. E faafetai i le alofa o le atunuu ona o le valaauina.

Sa i ai le manatu e faamaea le tatou galuega i le po anapo, peitai ua faalaolao e le Atua lenei taeao, tatou te feiloai ai i manu faaifo mai lagi.

O le tatalo faifaipea, tau ina ia saga faaaupegaina pea lou finagalo i le faauuga a le Agaga Paia, to mai le lagi auupega e taumua ma taumuli ai lou valaauina, aua le sa o le atunuu, e ala i le taitaiina o le tatou Faigamalo.

O le matou faafeiloai atu lea i lau Afioga, ia afio maia ma tala mai aao.

**Afioga Hon Fiamē Naomi Mataafa (Palemia):** Ia faafetai lava i le saunoaga faafeiloai a lau Afioga i Fofoga Fetalai. E faatalofa atu foi i le paia maualuga o le Fonousu a le atunuu. Sa leai se manatu o le a faalavelavea le faagasologa o le tatou Fono, ia ae faafetai le faaloalo. Atonu e i ai se taimi, ona maua lea o so matou avanoa e fai atu se matou tala. Ae faafetai tele ua toe taliu mai i fanua ma le manuia, ae o lo o faapena, ona maualuga pea le masina i lau Afioga i le Fofoga Fetalai, faapea le mamalu o le Fono a le atunuu. Faafetai.

**FOFOGA FETALAI:** Ua malo saunoa i lau Afioga i le Tamaitai Palemia, o le Taitai foi o le atunuu. Malo lava le malaga manuia. Lau Afioga le sui usufono mamalu mai Faasaleleaga 5...

**Afioga Peseta Vaifou Tevagaena:** E momoli le faafetai i lau Afioga i le Fofoga Fetalai. E faamalulu atu foi, o le ala faamumu atu lea o lau moli, se i faafeiloai atu lenei Itu, e taua le faigamalaga.

Ia ua faamalo folau i lau Afioga i le Tamaitai Palemia. Ae ui i lea, ona o lea ua muamua lau Afioga i le Fofoga Fetalai, ae soia e i ai se taimi.

Lau Afioga i le Fofoga Fetalai e tulai atu ma le agaga mauualo, sa faalogologo lava ma le totoa i le saunoaga matagofie foi a le Afioga a le Minisita. Ona o lea ua faamanino mai le tulaga lea, e pei o lea ua tau agai mai i le atinae o tai miliona lea e tuuina mai i itumalo. A o lea lava e mautinoa foi e le toatele foi o le Palemene, e pei o lea sa saunoa lava le Taitaifono ma le Afioga i le Minisita o Faatoaga, o le miliona lea e tuusao atu lava i itumalo. E fai ai a latou fuafuaga. A o lea ua toe faalogo atu i lau Afioga i le Minisita, e pei o lea ua toe agai atinae nei i lau Matagaluega. E tuuina atu i inisia e tapenaina ia spec ma mea faapena. E pei o le agaga lea lau Afioga, e pei e foliga mai la, o le a sili atu ona taugata.

Aua a silasila i ai, o le tele foi o afioaga i itumalo, o isi itumalo e ova atu ma le taisefulu afioaga. E masalo pe na o le tai valusefulu afe, fitusefulu. A fua la i auala ia e fuafua e nai... o lona uiga e na o le tanutanu lava. O le agaga lea e tuuina atu ai le tuualalo i lau afioaga, se i toe silasila, aua o le tele lava o itumalo, o la lava e mafai ona faatino e itumalo, i nai a latou seleni. Ona o la e i ai a latou, e pei o mauga, e tanutanu ai lava o latou auala. Ae pei, foi lele, a agai loa i tulaga ia, o lona uiga ua sili atu ona taugata, o le a le mafai ona... e pei o tulaga lea lau Afioga i le Minisita o lea e tau avatu ai le tuualalo. Ma lou faaaloalo lava.

**FOFOGA FETALAI:** Ia malo faafetai. Ia lau Afioga i le Minisita.

**Tofa Hon OLO FITI AFOA VAAI:** E faafetai atu i le Afioga i le Minisita mo le mataupu. E manatua foi o le tele lava o aualagalua ia ua nofoia, e le mamalu o le atunuu. O lea la e agai atu i ai le paia o le tatou Pulega. Ae pei lava o tulaga o tatou aualagalua, ia o le a fai, o tuamaota, i tua atu o mea o lo o papaaao ai ia le mamalu o le tatou atunuu.

Lau Afioga i le sui usufono, o auala o le poloketi a itumalo. A fai e fai se toganiu, vaeatu le paia o le Maota, i uta, e tatau foi ona sua i ai le auala, o le poloketi atoa lea e tuuina atu i o. Ae pei ona fai atu lau tala i le taimi ua sola, manumanu i le tulaga o le tele o tupe...ua ova ma le tai sefulu miliona i le tausaga e faaalu i mea nei o aualagalua. A o le tele o aualagalua lea na ou talanoa atu ai, ua toe sosolo mai lava vao ma toe taei le ta sei tulou. Ona o le le tilotilo lelei i le faaoga tatauina o tupe a lo tatou Malo.

O le tatou west coast road, o lena ua outou silasila i ai, ua toe faaauauina atu i le itu i Sisifo, mai Malua i le mea sa gata ai. O lea sa gata ai le auunaga a lou uso ia Tapunuu. O lea ua ou alu atu toe faasosoo atu, e tau i o i Leulumoega i le taimi nei. A o la foi ua faagasolo le tulaga, o le tauofoga i le alu atu lea agai i Leulumoega i le malaevaalele. E le o i ai lava se tulaga toa o le galuega lena i le taimi nei.

O le tatou cross island road, le auala lea e alu atu i Tanugamanono i Siumu, e pei ona laga foi e le sui usufono o Siumu. Lau Afioga i le Fofoga Fetalai ma le mamalu o le Maota, o lea ua faagasolo nei ia tauofoga. Ou te faamalulu atu i le tulaga sa tuatuai ai le galuega lena. Ona sa taumafai lava e toe sailia se isi finagalo o le tatou donor, le World Bank, ina ia aumai se faatagaga e taumafai ai e tuutuu ai i totonu tatou konekarate. Aua e pei lava foi ona silafia, e pei lava na o le lua tatou konekarate po o kamupani ia e qualify i galuega ia, galuega ia e fund mai e le World Bank ma le ADB. Ae mafua, e sau ai ma le faaupuga foi lea o le mafuaaga, o le lava o le capacity o le tatou konekarate. O lota faanoanoa ia i ituaiga mea ia e tulai mai. So, o le fesili la, pe faapefea ona tatou fetagofi e improve le capacity o tatou konekarate, tatou inisinia? Ia o le mea lena na mafua ai ona matou finau atu i ai, e le mafai ona improve pe a le tuu maia i ai galuega faapenei. O la e la ua i ai le fuafuaga lena o le a i ai se auala e mafai ai ona faaoga tatou konekarate i le auala lea o le Cross Island Road.

**FOFOGA FETALAI:** Malie le Afioga i le Minisita se i tulai mai lau Afioga Tapunuu, le sui usufono mo Vaimauga 3.

**Afioga Hon Tapunuu Niko Lee Hang:** Faafetai mo le avanoa. Na o se toe faamanatu atu i le Afioga i le Minisita, o capacities lea e te saunoa ai, o le mea lava lena a le World Bank po o le ADB, e le faia e tatou capacities. Ae i ai le taumafaiga sa taumafai ai i le matou taimi e toe tuu mai se avanoa e toe saili ai, e vaavaai lava e tatou konekarate ina ia ausia le capacity. O lea la na fai ai faa-vaega galuega, ofo mai taitoalua taitoatolu konekarate, ina ia maua ai le capacity lea. Ae pei o le tulaga lena e faamanatu atu, e le faia e tatou ni capacity, e fai mai e tatou donors. Ma le faaaloalo lava.

**FOFOGA FETALAI:** Tulai mai lau Afioga i le Minisita.

**Tofa Hon OLO FITI AFOA VAAI:** Ia, faafetai. E pei o le vaega tonu lena o lau faamatalaga.

**FOFOGA FETALAI:** Lau Afioga i le Minisita, se i tulai mai le sui usufono mo Falelatai ma Samatau.

**Afioga Lupematasila Galumalemana Tologata Togia Tile Leia (Falelatai ma Samatau):** Lau Afioga i le Fofoga Fetalai, mo le faasaoina o le taimi o le Afioga i le Minisita, leaga o lea ua fesiligia le capacity, ae silafia foi e aafia ai le asosi a inisinia i le vaega lea. Ae pei ona saunoa foi lou uso a sui usufono, ia o le tulaga masani lena, o lo o i ai le capacity o tatou inisinia e faatino ai galuega, a o aiaiga lava ia a le Faletupe lenei o Atinae o Asia faapea foi le World Bank, e pei e omai lava e le gata e aumai tupe, ae mananao foi e aumai kamupani mai fafo e faia le galuega, aemaise o le requirement lea e tataua ona avatu le bank statement a le konekarate e fia miliona la e i ai.

Ae pei o nai vaega na, o le luitau foi mo le faigamalo o lo o i ai nei, ia taumafai feutagaiga nei ma faletupe o lo o maua mai ai fesoasoani. Ma le faaaloalo.

**FOFOGA FETALAI:** Faafetai. Ia lau Afioga i le Minisita.

**Tofa Hon OLO FITI AFOA VAAI:** Faafetai. Lau Afioga i le Fofoga Fetalai, o le agaga tonu lena o le faamatalaga, ona o le tulaga lava ia o requirements a banks ia e lua, e sau ai lava le tulaga lea faapea e le o i ai se capacity i tatou konekarate iinei. O le mafuaaga foi la lena o lea sa tau fetuutuunai ma toe tatalo atu. Faafetai o lea ua aumai le fautuaga ma le faamaite. A o le agaga tonu lava lena o lea sa faatuatuai ai le galuega lea, ona o lou taumafai ma le Matagaluega e toe saili pea ma tuitui i le World Bank ma le ADB e alolofa mai ina ia siitia le capacity lea e manaomia i latou requirements mo le lumanai, ae faafetai tele mo le fesoasoani mai.

I le tulaga o pasiga o taavale ia ua toe oo mai nei i le LTA, masalo o le aso muamua nei, po o le Aso Faraile lea o le a amata ai ona agai le LTA i le pasiaina o taavale, ia po o le laiseneina foi o taavale afi.

I le tulaga lea na saunoa ai se tasi o sui usufono e faapea e faafa ona laisene i le tausaga taavale laupasese, ou te faanoanoa e faasilasila atu e le sao ia tuuaiga. O le tulaga lava ia, e faalua lava le pasiaina o taavale, lea foi sa faaaoga mai e le Matagaluega o Leoleo, ma o le tulaga foi lena e faaauau ai e le tatou LTA le pasiaina o taavale mo le saogalemu o le atunuu. E le o se isi lava itu po o se suezatupe e faalua ai, o le suezue lava o le tulaga o le fitness o taavale ina ia saogalemu le atunuu i femalagaiga.

E i ai foi le fuafuaga lau Afioga a le Fofoga Fetalai i le pasiaina o taavale lea o lo o faatalanoaina nei i le taimi lenei i le outsource o le pasiaina o taavale agai i tua, pe lua i tua i Safata po o fea lava, e faapena foi i Savaii, ina ia taumafai lava e fesoasoani i le atunuu i le agai mai Apia i le mea e tasi. E faapena foi la i Salelologa i e agai mamao mai Salelologa i le pasiaina o taavale. Ae ou te talitonu lava pei foi ona saunoa, o lea e i ai le tatou asosi lea o inisinia, o le tele ia o inisinia foi, mechanical engineer la e i ai o le latou matafaioi lea, ia po o ai lava e fia faatu lana ia pisinisi, aua o i ina e assess

agai i ai le agavaa o le faatuina ma le outsource ina o le fuafuaga lea a le tatou LTA.

Ia, ona ou oo mai lea i le Pulega o le Suavai lau Afioga i le Fofoga Fetalai, o lea o le a uma lava, ua ou usitai lava i lau faatonuga e faapuupuu ona o lau faigamalaga. O le tulaga lava lea lau Afioga, tasi lenei o tatou auaunaga lau Afioga i le Fofoga Fetalai o lo o tulituli pea e le mamalu o le Maota nei ma le mamalu o le tatou atunuu i lana auaunaga. Ia o lea ua manino le saunoaga a le Afioga i le Minisita o Tupe i le pau lea e i ai le tulaga foi o le tupe lea faaagaaga i galuega a le suavai, ia o la e sa manino le tulaga lena, ma o lo o taoto se vaega o le tatou Malo ona o lea ua take over e le Malo i le taimi nei le fund lena e faatali ai le latou talosaga toe tuuina atu i le EU e faatino ai le tatou galuega, a o la e ua i ai le tupe e faatino ai le tulaga lea.

O le vaega lea i nisi o talosaga e manaomia le suavai mama pei ona tatalo mai ai le sui usufono o Gagaifomauga 2 i le tulaga lena. E sao lelei lava, o le faigofie ia o le faiga o le process e tali atu ai loa le Pulega o le Suavai mama, ou te le iloa po o le suavai independent po o le suavai palapala tulou le Maota. E faigofie lava, na ona faasaini mai lava o le pulega a alii ma faipule ua latou malilie o le a agai mai i i le Pulega o Suavai mama, ia alu atu loa ma le approval. Ma o le naunautaiga foi lena o le tatou Malo i le vaega lena, e manumanu foi i le soifua maloloina. Ae peitai i le taimi lava lenei, o lea lava e faatumauina le tulaga o nisi foi nuu i le mea lava lea o le palapala o le suavai ma e leai se treatment foi lea i le chlorine lea e fai ai aua lo outou soifua maloloina.

Ia, ona ou oo mai lea i le vaitaumafa lea o Tiapapata lea sa saunoa i ai le sui usufono o Siumu, o lo o faatali nei le tatou pamu tele e toe pamu ai le vai lea agai i luga o la e ua ready tatou faatanoa ma tulaga faapena. Sa ma talanoa ma le Afioga i le Pule, a le o le faaiuga o le masina nei o le masina fou ona faapipii loa lea o le pamu lea i le suavai lea e serve mai ai... ou te iloa o le toatele lava o le Sui Taitai, o Tapunuu ma outou uma ia o le a gravity feed mai ai lalo le tatou suavai.

O lea vai lea sa tatalo mai ai le sui usufono o Aleipata Itupa i Luga, o lea e i ai le faamoemoe o le tatou... o lea ua amata ona fai atu le study o lena foi fuafuaga i Lalomanu e fuafua ai se tatou porehole, ae moni, i le tulaga o le sualua o le suavai. E oo lava ia matou foi i le matou itumalo i Salega, amata mai lava i le itumalo o Valasi, ia e sualua uma lava matou suavai, ae tatou onosai, ia lava pea le onosai, o lea o le a faasolosolo atu le tatou galuega i le tulaga lena.

O nisi foi o vaega o le tatou atunuu, o lea ua amata ona tavili lava tatou poreholes e reserve atu ai i le taimi pe a faapea ua le lava le suavai i faatanoavai e maua mai le timu. E pei o le tulaga lena o lo o i ai le Pulega o le Suavai, a o nisi uma fuafuaga o i ai, ia faaoo mai pea tusi talosaga, e le faapea o lou manao seiloga e talosaga mai tusitusi, e leai. O le faamanatu ina ia aumai e record ma agai i ai le faasologa o tatou galuega.



I le tatou Matagaluega lava lea e tasi i totonu o lenei itutino o le Ministry of Works, e avea foi lenei avanoa ou te faafeiloai atu ai i le afioga i le Ofisa Sili o Pulega le afioga ia Vui Tupai Mau Simanu, o lea ua i luga o le tatou galuega i lenei taimi. E faafeiloai atu ai foi i lau Afioga i le tauavega o le tatou Matagaluega lea o Galuega Tetele a le Malo. Ia e le tau... ua leva foi ona e galue i totonu o le EPC ma totonu o le Sector lenei, ou te iloa foi ua sololelei lava le tulaga ua e masani foi. Ia faamanuia le Atua i lou tulai mai.

O le tatou PUMA ma pemitia ia o fale, tasi lenei vaega e ese le tele o le faafitauli o lo o tulai mai i totonu o lau Matagaluega i le mea lenei, aemaise lava i le aufaipisinisi. O lea ua i ai le manatu ia te au ona o le tulaga o faasalaga la e i ai pe \$5,000 ea pe a faapea e fai se atinae ae le i faia se development consent ia po o se a lava ma se pemitia, ona e pei lea e foliga e taaalo i ai le aufaipisinisi e faapea na o le \$5,000. A ua i ai le faamoemoe e avatu se matou talosaga foi i le Afioga i le Tamaitai Palemia ma le Kapeneta, e sili ia le tuu lava i luga i le mea e aua ai ne i toe faia. E pei e faataaloga i vai le mea lea o le fai o atinae ae le iloa atu, ae le faia development consent, le faia pemitia. E lua nisi o galuega tetele lava lea ua tutu i le taimi lenei ua ou taofia, e fai lava e leai se pemitia ae ou te iloa o galuega tetele ia, masalo e ova i le tai \$1 miliona po o le \$2 foi miliona le mea la e ua fuafua i ai le faiga o le ata. O popolega lava na ma le tulaga foi lele ia te au ma lau tilotilo i mea ia o lo o fai nei. O lea foi la e avatu ai se tuualalo i a outou Afioga i lena Itu ma lea Itu i tatou polokalame lea e fai o tatou Ofisa i itumalo, ia outou alolofa, agai mai e fai a tatou... o lea lava foi ua i ai le tulaga faafaigofie foi lea ona e manino lava le tulaga i pulega a alii ma faipule. Ae afai ua taofi atu e lau Matagaluega vaega uma na, ia, ona outou finagalo malilie lea, o la e faatino galuega a lau Matagaluega. Pe tou te tolotolo mai ia te au faamolemole i ai se taimi, ou te fai atu, leai, taofi nei lava, fai muamua a tatou development consent fai pemitia ona faatino lea o Ofisa o tatou itumalo. Ae avea foi le taimi lenei ae le i agai atu sau faamatalaga ou te faafetai atu foi ua maua lenei avanoa, e momoli atu lau faafetai tele i le afioga ia Magele Hoe Viali mo le auaunaga foi i le tatou Matagaluega nei. E tele lava le tulaga foi ma aoaoga ma mea uma lava ma lou sao taua i le tauaveina o ou tiute i le tatou Matagaluega, tele foi le tomai. Ae talitonu lava le taofi, e eseese lava fuafuaga a le Atua ma Lona finagalo i mea e fetuutuunai ai ana auauna i lea mea ma lea mea. O lea ua tapuni atu le isi faitotoa, ae tatala le isi faitotoa. O lea foi sa ou talanoa foi i le afioga ia Magele, e faaoga pea lona tomai o lo o i ai nei o lo o manaomia pea i totonu o nisi o fuafuaga a le Matagaluega.

I le tulaga i le tatou Civil Aviation i totonu lava i i, o le tele ia o fesili ma mea ia o vaalele ma tulaga faapena. O lea ua uma ona saunoa foi le Afioga i le Minisita o le Samoa Airways i le tulaga sa i ai. I le taimi lava sa fevesiai ai le tulaga lea i le Minisita ma lana Matagaluega i le Samoa Airways, o le

taimi foi lēna sa matou migoi ai foi matou, matou te saili se isi itu ma se isi faiga e tau fai ai le mea lea e finau ai i le leai o se tatou vaalele.

Lau Afioga i le Fofoga Fetalai ma le mamalu o le Maota, o lea ua... pei ona i ai o lea ua i ai le Fiji Airways, o lea foi ua uma ona avatu i ai le laisene e faaoga ai le tulaga o le route foi lea e alu atu iinei i Apia i Honolulu ia ma le toe foi mai inei agai i o i Nadi, Niu Sila. Tasi lēna vaega. Ma ou te fiafia e tau atu lau Afioga, pei sa ta tuli lava e le tatou atunuu le tasi o le vaalele ma le leai o se vaalele. Ae sa le nofonofoai lēnei Matagaluega ae saili loa se isi itu. O le taimi lēnei, e 4 kamupani vaalele ua agai mai ne ii Ausetalia i inei, o lea sa taumafai i ai. O le kamupani la lea aua o lea ua i ai le Fiji Airways, o le Quantas, lea faatoa uma nei ona saina le... Tapunuu, lea faatoa uma na saina le mea lea sa ou naunau atu ai e aumai le mea lea i le Airways lea e le i mafai ona aumai, o lea la ua uma ona fai, o le vave ia. Ia o le Virgin lau Afioga i le Fofoga Fetalai ma le Air New Zealand. O le Air New Zealand lea ua uma ona saina le latou direct flight i le route lea mai Sydney po o Brisbane po o ai lava mai Ausetalia i inei i Samoa. E 4 la kamupani vaa na o le a galulue i totonu i i. O le mea sa tilotilo i ai lau Afioga i le Fofoga Fetalai, o lea faatoa maua nei i i se competition i le 4 kamupani vaa lea, ma o ina foi e i ai le faamoemoe o le a pau ai i lalo pasese. Leaga o le taimi foi lēna, manaia foi le fuafuaga foi a le faigamalo talu ai o le taumafai pea e tulei le tatou vaa ia sikuea ma mea faapena. Ae ana faapea la e maua se tatou tala sa i ai i totonu, semeamanu o le mea lēna. Ae o le isi auala lea ua matou uia, o le taumafai loa e aumai ia faatele kamupani vaa e feoi mai i Samoa ina ia maua ai le tulaga faatauva. Ma ua mtou fiafia foi le matou Pulega o Malae Vaalele o le a tele ai tupe maua a le kamupani vaalele i landing fees ma tulaga faapena, o grant hellings, ia ma ou te tau atu foi, o vaalele ia, na o le i luga lava o le vateatea tau mai loa ma le tupe a Samoa. Sa matou le tilotilo i se isi pito ae matou tilotilo i le aofaiga o vaalele e charge ai le tatou air space o le Pasefika, lea foi e maua ai le tatou tupe maua. Ia o tatou landing fees ma mea faapena. Ae o lea foi la ou te tatalo atu i le Minisita, alofa o lea foi e i ai le aitalafu i i a le Samoa Airways i le Airport Authority pe \$2 miliona, o lea foi na o le maosiosia o le matou malae vaalele i le Samoa Airways, a o lea lava e nofo aitalafu ia matou. E pei la o le mea lēna e tatalo atu ai foi i lau Afiog i le Minisita, se i manatua mai le Airport Authority i lau tupe lēna e \$6 lēna ua fuafua atu.

E i ai foi la ma le manaoga lea na talanoa mai ai foi le Afioga i le Minisita o Tupe, i le tulaga lava lea o le monitor ina o aseta taugata a le tatou Malo lea foi o le a faatuina atu ai i le Matagaluega o le MWTI se tatou division faapitoa e monitor ina aseta taugata a le Malo. E le faapea o le a aumai i i ona faapea lea o aseta e pule ai le MWTI. E leai, na ona omai e monitor atu le tulaga aua o lea e i ai uma i i inisia e avatu le fautuaga ma lapatai atu, a mea o le aso lēnei e fai ai le maintenance, o le aso lea e tatau ona fai. Na o

le Samoa Airport Authority ma le Maritime o lea e fai ai le galuega lea o le taulogologo i ai ia latou o aso ia e fai ai le calibrations ma mea faapena.

O le isi mea, e fai lava lau faataitaiga o CT Scan ma mea ia o X-ray a tatou i le maota gasegase, seiloga lava ua leaga ona faatoa iloa lea ua fetagofi i ai inisia. Ae ia te au ona o lea e build up le inisia lea ma le tomai faainisia i totonu o le Matagaluega, ia ona taumafai lea e aoao mai tomai taitasi i totonu i i e fesoasoani i le vaaiga o aseta tagata ia a le tatou Malo ma faamanatu i ai o le aso lea e tataua ona fai ai le tausiga po o maintenance i a tatou masini.

Ia, ou te iloa ua maea atu lau Afioga i le Fofoga Fetalai, ae se i oo atu i si ou itumalo. Le paia e o si ou itumalo, i le susu foi o lau susuga i le alii Sea lau Susuga Maanaima ma le Peresetene foi o le Auso, le afaigaluega a le Atua i totonu o le tatou itumalo i so o se fatafaitaulaga. E faapea foi le afio o Matautia o le Tuiatua ma le Tuiaana ma le falefa o ona Alo, le paia i le Aiga Samoeleoi, le Aiga Sa Lilomaiava, afio foi le Matua, le Maopu ma le Alaalamaota, alaalatai foi le lua sa seelua Sela ma Oloeleaeaeesefili ma le mamalu i Tootoo o le Alataua.

O upu mulimuli lava, o la outou auauna nei e faafetai atu i lau tapuaiga, o au talosaga foi lea ua manuia ai foi taumafaiga a la outou auauna nei. Tatou tatalo faatasi pea ia agalelei le Atua ma faafualoa lo outou soifua, maua foi sou ola aua le faatinoina foi o le tatou valaauina.

E faapena foi ona faafetai atu i le tapuaiga a Samoa atoa i la outou nofo tatalo foi aua le tatou Palemene. Ae faapitoaugafa se faafetai lau Afioga ma se faamalo i Ofisa Sili o Pulega ma leni itutino o le tatou Malo...

**FOFOGA FETALAI:** Malie ia lau Afioga i le Minisita ona o lea ua leva ona mumu mai le moli a le sui usufono mo Lefaga ma Faleaseela, po o le a se mea o... po o le faaopoopoga o lau faafetai?

**Afioga Masinalupe Makesi Masinalupe (Lefaga ma Faleaseela):** Faafetai i lau Afioga i le Fofoga Fetalai mo le avanoa. Ia, ua leai lava se manatu e faalavelave a o sausi le lauga matagofie a le Minisita. E pau lava o lea, ne i te i ua faauma moi le lauga a le Afioga i le Minisita ae le i avatua foi se tulaga e pei ona i ai. Ia, na o le pau lava o lea, o lo o faafogafoga mai si o matou itumalo e tusa ai o le tulaga foi sa avatu ai nai manaoga. Pau o lea, o lea ua taaofai uma i le 48 itumalo aemaise o sui usufono sa lagaia le tulaga lea i tulaga tau auala.

Ia, e pei lava ona ou tatalo atu i lau Afioga i le Fofoga Fetalai e auala atu i le... ona o lea e i ai lava manaoga manaomia o si o matou nuu lea i tai i le mauga i Matafaa, ona o lea e vaavaai atu i le tatou Tala o le Tupe e \$6 miliona e faatino ai galuega tau auala i Savaii. E \$6.2 miliona mo Upolu. Ia ne i te i ua feaveai ae... ou te manatu lava e lava tele, ae ave lau faamuamua i nai auala ia, o auala e le o ni... o auala a le Malo, public road. O lea e avatu

ai ma talosaga atu i lau Afioga, aua ou te matauina, o oe o le isi Minisita e ave lau faamuamua i mea e manaomia, aemaise lava o le tulaga i tagata. E pei lava ona i ai foi le anavatau mo soifua o tagata, aemaise lava o si nuu lea e fai si faigata o auala e omai ai i le falemai. O lea e talosaga atu ai i lea vaega, ma nai auala ia... o auala lava ia o tai i le aai, e faasolo i uta. O le puipuiga lea e i ai ma le... ia malutia mo le taimi o Tsunami aemaise o le faaletonu o le tau. O auala lava ia na o auala lava tau le Malo mo le maintenance. Ia, atoa o lea foi na ou taua le uafu lea o lea ua auala atu i nisi... i le resort lea o le Return to Paradise i nisi e faatinoina le uafu, lea na ou taua ai o lea ua malilie alii ma faipule o Tafagamanu, si o matou nuu lea e faatino ai le uafu. O lea foi la ua ia te au le latou sainigalima, e fia iloa po o fea tonu le vaega e faaoo atu i ai pe faaoo atu i lau Afioga.

Ia na ou taua foi la le pasiaina o taavale, ona o le mea moni lava o lea lava e fai ma o atu i le tele o taimi, o lea lava e faafa ona pasi, ae fia faamautu i le tausaga, ia pe na ona faalua ona pasi pe... ina ia mautu, ona o lea lava e o atu pea ma fesili i ai i le LTA, a o le mea sili o lea ua maoti mai le tulaga lea i lau Afioga i le Minisita, o lea ua toe i lalo o la outou Matagaluega le vaega lea. Faafetai.

**FOFOGA FETALAI:** Faafetai, o lea ua maua lou finagalo. Tulai mai lau Afioga i le MinIsita.

**Tofa Hon OLO FITI AFOA VAAI:** Faafetai. E faamalulu atu e pei lava ona ou fai atu i le taimi ua sola, o lea ua faamauina uma lava outou finagalo i auala e pei ona laga, ae ona o lena ua e saunoa mai, e sao lelei, i si afioaga lea o Matafaa. O le mea sao lava ou te le i oo lava au i le nuu lea, ae ta te vaai i ai ma le alofa foi lea i le maomao atu i le itu i tai. Aua e te popole, ta te o i le ta land cruiser lea e vevesi ai ta te o ta te... a le au i ai le land cruiser, o le a toe oka foi se isi ta taavale ia ou au lava ta te o i Matafaa. Ae faafetai mo mea uma lau Afioga i le Fofoga Fetalai.

E pei lava ona fai atu se tala, e faapitoaugafa lava se faafetai i Ofisa Sili o Pulega o Matagaluega ma Pulega Tumaoti a le tatou Malo pei ona matou feagai ai i le matou galuega faifaatasi ma le matou auaunaga i se matou faatauvaa ma se matou vaivai, o lea e taumafai atu ai se auaunaga i le mamalu o le tatou atunuu i Afioga i alii ma tamaitai Ofisa Sili o Pulega e faapea foi i tupu ma ee o le tatou atunuu o lo o tautua i totonu o lenei itutino o le tatou Malo. Malo faafetai i le tatou galuega.

E faapea foi ona ou faafetai atu i nai ou uso a Minisita Lagolago. E moni lava o le tele o taimi e taufai Taitaifono uma i Komiti Faa-Palemene, ia ua alu alu foi ua tau leaga ai ma lou ulu i le omai i i ae tiai le matou galuega. Ia, ae faafetai lava i a oulua Afioga i le lagolagosua mai foi i lau galuega ma le tulaga foi o le faatinoina o tatou tiute. A ia sausuina uma outou,

Matagaluega ma lenei Palemene atoa i le toto o le tamai mamoe. Soifua ma ia manuia.

**FOFOGA FETALAI:** Ua faamalo saunoa, faafetai foi i lau Afioga i le Minisita o Galuega Tetele, malo lava le saunoa faaaloalo, malo foi le saunoa malamalama. Atonu o lea ua manino ma malamalama tulaga uma o mataupu sa laga e le paia o le Maota, atonu o lea ua faamalieina i lau saunoaga, aemaise lava o itu taua i mea tau auala, eletise ma le vai, o lea foi ua oo i vaalele, o lea ua manino foi le saunoaga, ia o lea o le a fa lelei ituaiga kamupani vaalele lea o le a aumai i Samoa. Ua faafogafoga mai foi i atunuu mamao nai o tatou tagata ia lea ua tele lea fesoasoani mo latou. O le mea lea, malo saunoa, faafetai foi le tofa, malo foi le galulue i lau Afioga ma le tele o au Sector o lo o outou galulue faatasi aua lava le tautuaina o le tatou atunuu. Malo faafetai.

Talu ai o lea ua tatou taunuu i le tatou malologa, malo lava o lea ua maea saunoa le Afioga i le Minisita o Galuega Tetele, ia, ou te talitonu o le a faataatiaese tatou galuega, tatou te toe amata e tusa o le lafo i le itula e 2:00 ma faaauau ai le tatou galuega. O lo o ua tapena foi le tatou taumafataga o le aoauli aua le faasiligamalos i le paia o le Maota.

O le mea lea, ou te faasilasila atu o le a faataatiaese Galuega a le Fono Aoao mo lana malologa, tatou toe feiloai i le itula e 2:00.

***Na faataatiaese Taulumaga a le Fono Aoao Faitulafono i le itula e 1:00 i le afiafi.***